

清光緒朝中日交涉史料

卷六三之卷六四  
廿七年



清光緒朝中日交涉史料卷六三

(四五二七)南洋大臣劉坤一來電

光緒二十七年三月十六日到  
電報檔

駐甯日本副領事函日歷四月廿九即華歷三月十一本國皇太子誕生皇孫等因應否由鈞處電李使道賀之處乞酌坤一咸

(四五二八)軍機處擬致劉坤一電信

光緒二十七年三月十六日  
電寄檔

咸電悉日本誕生皇孫如各國均致賀中國亦應傳旨道賀希由貴督轉電李使查明辦理  
樞諫三月十六日

(四五二九)軍機處擬致奕劻李鴻章劉坤一張之洞電信

光緒二十七年三月十七日  
電寄檔

昨因賠款亟須指實以便定議撤兵輾轉咨商恐多延誤是以咸電擬將洋稅作抵茲據戶部覆稱各海關洋稅歷經借抵各項洋款無餘不得已只好將鹽課鹽釐漕折漕項及各關常稅全數備抵實可得銀二千萬兩若四百五十兆三十年之說數巨期迫力實不支必須

減數展期極多至二千萬爲止方可勉力做到卽稍有不敷則俟加稅議成彌補足數此次中國受此大虧舍加稅別無法想當亦各國所共諒總期竭力磋磨指款速定早日撤兵至盼至要仍希速復樞洽

(四五四〇)慶親王奕劻大學士李鴻章來電

光緒二十七年三月十八日到  
電報檔

各使館擴充地界甚寬界內佔用民地前據照會請歸中國付價當經駁覆以地歸使館佔用應由使館付價卽按公法戰勝亦不能強奪民產乃各使總以因拳匪攻館伊等得有自主防守之權強詞爭執駁論數次堅不允從失產之人情甚可憐祇可從權派員勘地驗契酌給價銀以示體恤除備文咨達外慶李篠三

(匹五四一)慶親王奕劻大學士李鴻章來電

光緒二十七年三月二十一日到  
電報檔

嘯電悉前據各使照會停考地方開單前來所開直隸省北京順天保定天津順德河間各府遵化冀州通滄景永清望都獲鹿朝陽文安武邑灤平等縣張家口新安鎮兩處山西省太原大同汾州朔平澤州潞安等府忻隰絳等州太谷孝義曲沃大甯河津岳陽文水壽陽

平陽長子高平絳縣平遙潞城洪洞等縣歸化綏遠二城河南省南陽陳州彰德等府鄭州光州河內濬縣太康襄城西華浙江衢州府山東泰安府湖南衡州府清泉縣陝西甯羌州江西鄱陽縣東三省盛京甲子廠連城于慶街北林子呼蘭城等處曾經備具說帖照會請照原條款分別滋事城鎮不得統指府州縣致良莠不分旋據照復斥爲欺罔迂謬實無情理可說現正與辯駁俟定議卽行具奏慶李馬

(四五四二)陝西巡撫岑春煊來電

光緒二十七年三月二十一日到  
電報檔

頃天鎮縣稟轉據天城驛馬夫稱十五戌刻接到兵部火票六張內崑中堂六百里奏摺一封並行在軍機處等衙門公文七角隨遞到下站陽和驛突被洋兵奮去僅拾回火票一張軍機處公文一角木板四塊據該縣提訊確實轉報繳呈前來查現據報居庸宣化懷安等處洋兵節節設卡若均如此奪棄公文則行在北京消息盡梗似應訂明郵遞暫章方免窒礙除電全權並咨崑岡補行奏咨外請代奏煊叩馬

(四五四三)軍機處擬致奕劻電信

光緒二十七年三月二十一日到  
電寄檔

聞京城使館界內各國有分修礮台之說該處逼近禁城關係重要不得藉防守爲詞聽其修築希即探詢明確如果有此事務向各使切實商阻萬勿允行樞箇三月二十一日

(四五四四)軍機處擬致劉坤一電信

光緒二十七年三月二十一日  
電寄檔

嘯電悉德奧比等國均有電致賀日廷中國自應照辦希即轉電李使傳旨致賀樞箇三月二十一日

(四五四五)軍機處擬致岑春煊電信

光緒二十七年三月二十一日  
電寄檔

寄電悉洋兵仍不時來晉游弋鄉試可否舉行自應稍緩再由貴撫體察地方情形請旨辦理並詢停考一節已電全權尙未據復樞箇三月二十一日

(四五四六)軍機處擬致奕劻李鴻章電信

光緒二十七年三月二十二日  
電寄檔

江督電稱駐寧美領事來見謂賠款事美願助中商減屢向各國言及中國財力不支而各國總謂中國能還此數柔使之意須由全權將中國爲難情形詳切照會各使商請大爲減

數展期柔使即可持此再商各國從中斡旋復據伍使電稱美肯減讓四分之一爲各國倡但不肯先言以致各國之疑等語可否即將此意照會各使俾柔使藉以居間調處惟不可漏出美使之意希酌辦樞漾三月二十二日

(四五四七)南洋大臣劉坤一來電

光緒二十七年三月二十三日到  
電報檔

駐甯美領事來見謂賠款事美願助中商減屢向各國言及中國財力不支而各國總謂中國能還此數柔使之意須由全權將中國爲難情形詳切照會各使商請減數展期柔使即可持此再商各國從中斡旋等語中國患貧已久負債已深近年核計出入款目歲短千餘萬本擬商辦加稅彌補尙未議定忽生此意外之變今驟增賠款無論如何開節每歲至多能還千餘萬若各國不肯見諒仍欲加多則中國無款辦事何以立國昨伍使電美肯減讓四分之一爲各國倡可謂力相助但不肯先言以致各國之疑擬請鈞處密電全權照柔使所言辦理將中國艱窘爲難切實照會俾居間調處者有所憑藉仍不可漏出自美使之意日德外部會允力助或因美使調停得以就範此機似不可失祈酌辦坤養

(四五四八)軍機處摘錄償款大致情形呈覽片

光緒二十七年三月二十三日  
上諭檔

償款一事全權前電稱各國索四百五十兆分三十年本利清還每年需銀三千萬兩內有一二國欲索現銀者若現銀則須外國銀行借八二折扣便需六百兆爲數更巨已由全權切商勿索現銀並請減數寬期昨據來函從旁探聽或可免索現銀減至四百兆展至五十年每年仍須銀約二千萬兩尙未明白登復確否尙不可知原擬商加稅加鎊價增款必多縱不足數添籌較易而英國不允縱使稅可酌加尙須緩議不能以此作抵必須將現有確款指抵方可初擬以洋關稅項約二千萬上下指抵而此款已抵從前洋債不能重抵惟有將常稅漕折鹽課釐各項約有二千萬全行指抵赫德會具節略卽主此說盛宣懷來電大致相同然去此數大宗中國常年用度僅恃錢糧釐金萬難措手且加稅必免釐則釐金又不可靠仍須另籌新款而如何新籌巨款甚不易易張之洞謂洋稅土釐鹽課等皆加倍抽收然究竟能否加收急切難於就緒指抵仍恐不允劉坤一謂鹽課釐萬不可抵迭次內外彼此往復電商實無良策惟盼全權極力磋磨多減償數再設法另籌新款並由各省督撫竭力整頓鹽務釐金各項切實裁節浮費湊集成數以期勉力支持再江鄂兩督來電均稱赫德將攬鹽課釐等項歸其徵收冀獲大利德外部亦言有從中漁利之人中國勿爲所惑



即暗指赫德如果聽其攪辦鹽務諸多妨礙緝私必用勇營彼且操我兵權其害甚大已密電全權留意矣聞各國意見不一各有私心不知究允減數寬期否謹彙舉連日各處電商償款大致情形撮要恭呈御覽三月二十三日

(四五四九)軍機處寄陝甘總督崧蕃等上諭 光緒二十七年三月二十四日

軍機大臣字寄陝甘總督崧蕃夏將軍色阿拉善王多光緒二十七年三月二十四日奉上諭前諭令飭查已革端郡王載漪行抵何處嗣據何福堃奏稱傳聞載漪在阿拉善旗地方患病是否屬實著崧蕃色普徵額多羅特色楞查明迅速派員解赴戌所毋任再行推延將此由六百里各諭令知之欽此遵旨寄信前來

(四五五〇)南洋大臣劉坤一來電 光緒二十七年三月二十五日到

李使電本日遵赴外部傳旨致賀外部代日主答謝請代奏盛鐸漾云請代奏坤敬

(四五五一)軍機處電寄奕劻李鴻章諭旨 光緒二十七年三月二十五日

奉旨近日商議條款如何情形數日未據奕劻等電奏殊深慮系賠款一節前據電稱四月  
底方能開議如遲至彼時設仍須辯論則又多延時日能否設法催辦竭力磋磨速定公約  
以期早日撤兵該王大臣務將商議情形隨時電奏欽此三月二十五日

(四五五二)慶親王奕劻大學士李鴻章來電

光緒二十七年三月二十六日到  
電報稿

昨各使照會賠款共索銀四百五十兆兩上下并引總綱第六款所載擔保如何賠補之語  
請聲明承認此數并指明如何擬籌理財辦法請還欠款等因查賠款以速定爲妙聞各使  
已擬定息銀照加一倍共須九萬萬兩爲數甚大另籌理財新法斷難濟急擬以鹽課釐每  
年銀一千萬常稅三百萬釐金二百萬共壹千五百萬兩分三十年還清不提加息并以中  
國財政入不敷出前三項皆我度支要需勉強挪虧空更鉅請允將洋商貨稅酌加三分  
之一稍資抵補所加有限彼或不爭免釐較有寔益似此辦法與前奉治電尙屬相符尊處  
如以爲然擬卽照覆商辦明知彼難依允且第二次來晤必提加息再與相機磋商至減數  
一節亦擬竭力商酌肯允與否寔無把握祈速復勿誤慶李養

(四五五三)軍機處電寄崑岡諭旨

光緒二十七年三月二十六日  
電寄檔

奉旨據岑春煊電稱晉省後山一帶謠傳蒙古四子王部落調兵仇教近以洋兵西來蒙兵開槍經極力排解息事現歸綏道與教士商辦教案甫有端倪深恐蒙兵滋事致礙和局等語著崑岡迅卽嚴飭蒙古四子王部落約束兵民不得稍滋事端並知照察哈爾都統奎順一體妥爲約束毋稍大意欽此三月二十六日

(四五五四)軍機處擬致奕劻李鴻章電信

光緒二十七年三月二十六日  
電寄檔

養電已進呈各使照會籠統索銀四百五十兆上下不言分年加息亦不提現銀其中必有深意尊意以鹽課釐等項每年一千五百萬作抵分三十年償清不提加息俟其提及加息再與磋商並議減數蓋籌固善特慮一經照復彼謂如數已允再言息銀照加一倍必致仍合每年三千萬之數墮其術中從何措手似宜據各使前約那桐等討論所言償款每年祇能籌一千五百萬彼謂如此則須六十年方能攤完是各地已明知中國力量祇有此數嗣貴傳相晤各使屬將賠款大傅美使稱中國力量不過能賠至三萬一十萬兩爲止擬向各國勸減云云是四百五十兆之數美國果能實力相助必可減少祿等再四籌商自以先議

減數力與磋磨仍須留案加息銀地步倘三十年之限不能展寬告以中國已將鹽課釐等項度支要需勉強騰挪虧空甚鉅此外斷無從別籌巨款至彼問如何指定理財辦法則請加磅價酌量加稅及印花稅房捐等項陸續籌辦總之無論有息無息每年只能分償此數且防其欲索現銀與我為難務希尊處切實磋商萬勿鬆勁免致日後益難自立至尊意洋貨稅酌加三分之一約計僅二三百萬為數甚微反礙以後議加地步只須將加稅一事預先提明為下文張本卻萬不可先定擬加數目仍望裁酌詳審妥籌是為至要樞宥

(四五五五)慶親王奕劻大學士李鴻章來電

光緒二十七年三月二十七日到  
電報檔

聯軍撤兵之前奏准酌調袁馬兩軍應先期調到彈壓地方辦理善後事極繁要須有熟悉情形大員聯絡布置候補侍郎胡燏棻軍務洋務均極諳練現屆假滿已電調來京襄助一切請代奏奕劻李鴻章敬

(四五五六)湖廣總督張之洞來電一

光緒二十七年三月二十七日到  
電報檔

昨因呂使蒸電外部詢實在辦法當即覆之其略云擬每年至多認還二千萬財力止能如

此俟各國減讓定數後分年攤還以還清爲度懇其減數寬期並詢外部意可展爲若干年見覆以便商酌決不願以現有之鹽課漕常稅作抵此時中國須變法方能中外永遠相安且變法則事事開通各國商務必然日加暢旺然變法則應辦之事甚多應用之款甚鉅若現款全空國用無出勢必零星搜括百事不能興辦民生必更困窮內地將亂商務亦損敝處私意擬另籌丁捐一款以供抵還此次新債之用中國人丁最多除應免捐者不計外可捐之人數約二百兆每丁一年捐錢二百每年可得銀二千萬兩以外並詢德國意如以丁捐作抵可否等語查近日各使與徐那周三人晤商賠款節略英薩使曾問及人丁稅可辦否彼旣欲我辦丁捐則以丁捐作抵可望允許按二千萬之數如肯展爲二十年共止四百兆展爲二十五年共止五百兆考丁口納稅乃漢魏唐宋舊制漢之收數雖少其時錢值貴於今日十倍隋唐以來每丁稅數甚鉅載在史冊本朝雍正初年併丁於地天下涵濡德澤至深且久今爲國家多難恐外國之于我內政剝我民膏萬不得已而按丁酌捐爲數甚微不及前代十分之一正所以保衛民生斷不能議其苛斂此係集腋籌捐朝廷仍給以獎勵更與前代納捐不同其給獎之法每縣合計錢若干准本縣紳富收買捐票彙總核計請獎小戶仍可減成轉售尤於貧民無傷惟獎叙只准銜封翎枝及建坊請匾贖罪等事免於仕

途有碍此事法簡數輕應免者無妨從寬州縣但係中材即可不致擾累近年籌款者多持此說東撫袁亦有此議昨袁撫電奏謂籌款須合天下士民之力以應之卽指丁捐而言各國若允丁捐作抵可免于預別項財政保全實多竊思此次賠款無論本如何減利如何輕用何抵押每年本息總須還二千萬以外然仍須力圖自強事事振作開通以挽危局若不另籌巨款惟是悉索舊款盡付外人必致省其所不當省百事俱廢工商不擴學校不增京餉協餉本省軍餉皆無所出兵械全無大亂四起中國斷不能自存矣至鹽務抵債之害經西電已詳此萬不得已之策妄擬備採之洞肅經亥

(四五五七)湖廣總督張之洞來電二

光緒二十七年三月二十七日到  
電報檔

頃聞全權意竟擬照復各國以鹽課鹽釐常稅並釐金二百萬共千五百萬分三十年還清仍是四百五十兆之數又云俟第二次來文必提加息再與相機磋商等情不勝駭異美使尙願調停何以初次照覆並不請減實難索解既已許以三十年分還四百五十兆不提利息是賠數全不減矣倘第二次來文仍索重息必是仍將釐金漕折全抵與人不過分兩次說耳現款已盡加稅無多中國如何能支如何能存查外人圖攬鹽務衆口藉藉端倪已見

巧電已力主其流弊且近日票匪與鹽梟勾結將擾長江亦經電陳本日復稱有匪人包辦長江各衙門營局放炸樂之事頃在漢口查知鹽梟鹽船因聞鹽務抵還洋債之事恐必爲洋人攬辦鹽梟鹽船皆失其生業異常驚惶擾動是則鹽務抵債目前先有鉅患全權所請萬望勿遽允許洋貨加稅此正是好機會卽欲免厘抵除合計亦甚有益去年總署屢經考核議奏乃全權止擬酌加三分之一爲數幾微有何益處聞各使已允加洋稅爲抽百值十除去免厘所得尙多况尙須與商按鎊加徵之法倘竟照此照復洋人喜得我鹽務必不能更改挽回本旣不減亦不能另籌他項作抵矣全權似有成見所擬實爲非計務請鈞處詳慎裁酌切囑全權萬不可率行照復至禱之洞肅徑西

(四五五八)洋南大臣劉坤一轉李盛鐸來電

光緒二十七年三月二十七日到  
電報檔

頃外部送來謝電云我國皇孫誕生遠承貴國大皇帝致賀本大臣已奏明大皇帝我大皇帝深爲感幸有旨著本大臣致謝希由貴大臣代奏謝忱是爲至禱等因謹電呈請轉樞署代奏盛鐸有云請代奏坤宥

(四五五九)署理浙江巡撫湖南布政使余聯沅來電

光緒二十七年三月二十七日到  
電報檔

咸電奉旨各國索賠款四百五十兆分飭各督撫合力通籌必須確有指抵之款迅速電奏等因欽此遵與司道會商據稱浙省上年入款銳減出款驟增裁減各項充公早已和盤託出現在欠餉甚多卽再加搜括鎔銖悉較必至官民俱困零星涓滴無補滄海設以歲入常經盡抵賠款另籌國用則懸甑待食恐外患未平內憂四起等語此次索償太鉅自非另籌有著巨款無濟於事查海關加稅內地裁厘數足相抵於我無損此外可否請行印花稅及酌抽丁稅爲抵償的款此二項爲數頗巨似較畝捐等不同且可與各國約明不得以入教及居住租界倖免此中藉以收回權力如能飭全權王大臣與各使妥商說明由總稅司派員經理每年儘收儘解如額而止現雖看似無定之款而一經奉旨開辦卽係有著之款似非別項空言籌抵可比各國最重有著二字或當原諒允從聯沅終夜焦思別無善策事在燃眉惟有請朝廷速定大計先保和局再圖自強除鹽務情形遵旨飭議另行奏復外愚昧之見是否有當乞代表施行大局幸甚聯沅謹叩



(四五六〇)軍機處擬致奕劻李鴻章電信

光緒二十七年三月二十七日  
電寄檔

據江鄂兩督電稱鹽課釐抵償賠款鹽商鹽戶等聞將由洋人攬辦慮致失生業異常驚惶長江一帶鹽梟乘機擾動恐釀巨患萬望勿允鹽款作抵等語竊思各國既索有著抵款鹽務抵償既多窒礙請先將漕折常稅土藥釐金等款指抵如不足數再於鹽務內撥款補足較妥希酌辦樞沁

(四五六一)軍機處擬致岑春煊電信

光緒二十七年三月二十七日  
電寄檔

停考一事據全權電稱各使照會所開山西太原大同汾州朔平澤州潞安等府忻隰絳等州太谷孝義曲沃大甯河津岳陽文水壽陽長子高平絳縣平遙潞城洪洞等縣歸化綏遠二城當即商請照原條款分別滋事城鎮不得統指府州縣尙未應允現正與辨駁等語希即知照學政暫將指出各處綏考俟全權議定後再行知照辦理樞沁

(四五六二)南洋大臣劉坤一轉呂海寰來電

光緒二十七年三月二十八日到  
電報檔

呂使漾電遵電切商外部據稱丁捐恐別生事端而加稅英仍不允昨英商又紛紛稟沮德

亦無法告以加稅事關邦交非商所能沮借債虧折太多現銀難措仍望代籌良策彼云此時借債銀行自必居奇爲中國計應賠某國若干卽立欠票若干交某國握據暫示還本每年先按本出息俟數年大定後另籌還本之法或再借債亦不至受人挾制日後還本若干利卽遞減如此變通實大有益告以中國實係無力仍請德國倡首將賠款減讓再能免去利息分年還本互見交情彼云賠款四百五十兆兩無可再減利斷難免反覆商議彼云至少須四厘每年出利十八兆兩中國不致爲難以欠票爲據以從前借債未經抵出之進款作抵既有實在着落聯兵卽可撤退告以中國現在極力變法需款甚繁若將進款作抵非加稅無從籌備仍望貴國贊助彼云加稅一節先將賠款議結聯兵出京後國家照常辦事再與各國從容商議自可有成云云又據稱此係彼之私意與各國尙未妥商暫先電華惟大局攸關恐誤事機特摘密要陳或作傳聞之詞與各使商辦勿述海語以免掣肘爲幸乞轉樞譯並慶李張云坤轉勘

(四五六二)軍機處擬致奕劻李鴻章電信

光緒二十七年三月二十九日  
電寄檔

籌款一事近日中外條奏多以丁稅爲言果能辦理得法每丁歲捐二三百文尙不至擾累

而可集巨款現擬飭各省籌議奏辦惟各處教民皆係中國百姓自應一律認捐方免入教避捐致多窒礙卽在租界居住之華人亦必認捐惟必須先向各使言明定章方能舉辦查赫德節略卽有此議前次英薩使晤那徐周時亦曾詢及丁稅可辦否足見各使亦欲我舉辦此事應請尊處預與各使說定將來開辦時無論在教民人及租界寓居華民一律計口收捐不得歧異以昭公允並望商定電復樞艷

(四五六四)軍機處擬致劉嘉琛電信

光緒二十七年三月二十九日  
電寄樞

儉電悉絳縣在各國所指之內既無教案自不應停考希貴學政會同岑撫電告全權知照各使以免饒舌其各州縣僅一城一鎮滋事各國執定合屬應停考試本不允協惟經全權磋商尙未議覆所指之全府如有一二州縣中未經滋事戕害洋人者或就近附入應考之鄰府並考是在尊處相機體察妥辦總以不致外人藉口爲斷樞豔

(四五六五)軍機處擬致奕劻李鴻章電信

光緒二十七年四月初一日  
電寄樞

面奉諭旨前據順天府兩次代遞紳民呈請回鑾茲復據都察院聯銜陳奏具見依戀悃忱

朕恭奉慈輿駐蹕長安遙瞻宗社時切愴懷未嘗不急欲回鑾以慰天下臣民之望著奕劻李鴻章將和約迅速議結俾洋兵早撤以便定期回鑾該親王等即將此旨徧諭臣民人等知之至回鑾有期內廷應行豫備各事宜著傳諭世續屆時先爲料理欽此遵旨電達樞東

(四五六六)慶親王奕劻大學士李鴻章來電

光緒二十七年四月初六日到  
電報檔

前請飭調馬玉崑所部八營於洋兵將撤時來京已蒙俞允惟近畿一帶兵荒之後拳匪未靖土匪蠱起非厚集兵力不足以資鎮撫擬請將該軍二十營全數調用先派數營移紮順德趙州一帶就近赴保正兩府所屬助勦土匪免致洋人藉勦拳匪爲名派兵四出滋擾實於畿輔地方有益祈代奏請旨飭遵奕劻李鴻章冬

(四五六七)江西巡撫李興銳來電

光緒二十七年四月初六日到  
電報檔

昨奉電傳三月十五日奉旨各國索賠四百五十兆爲數過鉅著各督撫各就地方情形悉心籌議以期湊集抵償迅速電奏等因欽此查江西每年寔徵丁漕正耗釐稅連歷年籌餉節費奏提各屬平餘銀盈餘等項約共進項款三百六十萬每年撥解京協各餉內務府鐵

路邊防各經費及洋債鎊價暨解京漕折等共亦約三百五六十萬出入相抵已無所餘而本省綠營汎陸各軍糧餉及坐支廉俸部飯役食解漕脚費連外銷之科場經費辦公緝捕津貼薪水夫馬飯食一切零星款項合計尙須二百萬每年挹彼注茲已極支絀加以上年北方有事添撥直隸山陝及程軍月餉解京米價又五十餘萬尤覺庫空如洗與銳督商司道擬將上年添募各勇概行裁汰并節省一切浮費約可省四十餘萬然所短仍不下百六十萬又擬將漕釐稅逐一整頓進款或可增十數萬但積疲已久頭緒紛煩釐剔匪易目前尙不能遽定此皆江西寔情至此次各國賠款事關大局無論如何爲難均當先其所急容俟奉文指撥若干再行隨時籌解斷不敢以無款可籌稍事諉延然與銳竊有慮者近年各省匱乏情狀大與江西無殊此次賠款約計三四十年之內連行息鎊價非歲籌二三千萬不能應付縱使目前極力撙節無非挖肉補瘡非急籌開源之法難可有濟與銳現拜發條陳教務摺內有請設銀行製銀紙飭圓法辦保險四事似皆理財要務此外尙有印花稅若各省一律舉行不難驟盈千萬巨款但此事取諸商民較爲煩重不如前四事易行可否請旨飭部籌議逐款興舉以裕度支伏乞代奏與銳謹電呈江印

(四五六八)軍機處擬致奕劻李鴻章電信

光緒二十七年四月初六日  
電寄檔

呂使冬電稱德索兵費及民商償款共約二百五十兆馬克如不付現須年息四釐頭批限期付利以後歸本付利作保定章能允照辦當立撤兵等語尊處計已接到究竟償款與各國磋商能否寬期減數可否與德國先行減定償款首先撤兵各國或可相率從風庶免延誤增費希裁酌妥辦電覆冬電請將馬玉崑二十營全數調用一節本日已有旨電飭該提督先撥數營移紮順德趙州一帶就近赴保正應如何布置勦辦拳土各匪餘營聽調並希指示機宜隨時飭遵總須一面商令洋兵撤退毋致混雜滋事爲要樞魚四月初六日

(四五六九)南洋大臣劉坤一來電

光緒二十七年四月初七日到  
電報檔

和局漸定賠款繁重但就舊款騰挪無論如何裁節斷難支持非另籌新項不可本朝深仁厚澤聖相承永不加賦垂爲令典鄂督東撫仰體此意爰於無可設法中思及丁捐之一策具見籌畫苦心惟據呂使電德外部稱丁捐恐別生事端且中外情形不同將來造冊籌定捐數亦苦無所憑藉計惟有捐輸與印稅相輔而行雖稅則未便過重集款不如丁捐之鉅辦理較易措手查印花稅一項外洋爲大宗進款中國現議仿行所有厘金等項未可遽

更舊章若於厘金外行印稅莫如先就各項票據試辦串票爲完糧之據加貼印花稅票各省一律照辦餘如田房稅契捐官執照以及匯票提單等項凡執以作憑者均可仿辦惟當票多係貧民免貼稅票以示體恤約略計算每年可得千萬之譜有裨時局匪淺如鈞處謂然請旨飭下戶部查照各國印稅章程參酌妥善通行照辦明知民力艱難不忍稍事剝削然時勢危急宵旰憂勞天下臣民涵濡德澤二百餘年當能共諒其串票一項仍俟洋債還清卽行免抽印稅以示限制是否有當伏祈裁酌坤微

(四五七〇)慶親王奕劻大學士李鴻章奏按照和議總綱擬改總理各國事務衙門

爲外務部摺

光緒二十七年三月二十六日  
光緒二十七年四月初八日到

全權大臣和碩慶親王臣奕劻大學士直隸總督臣李鴻章跪奏爲按照和議總綱擬改總理各國事務衙門爲外務部恭摺仰祈聖鑒事竊查上年十一月奉旨批准和議總綱第十款內開總理各國事務衙門革故更新其如何變通之處由諸國酌定中國照允施行等語屢經各使公推承商此事之美使柔克義日本使小村壽太郎前來商酌茲據領銜使臣日使葛絡幹照會以各使公商擬請將總理各國事務衙門改爲外務部冠於六部之首管

部大臣以近支王公充之另設尙書二人侍郎二人尙書中必須有一人兼軍機大臣侍郎中必須有一人通西文西語均作爲額缺予以厚祿覈其所擬堂官共有四人足敷辦事之用各使每言西國外部祇一正一副至多兩副今於管部下擬設尙書侍郎各二已較各國爲多若再增加必至發言盈廷遇事推諉商辦要務轉致需時所論尙爲切要其所以請用王公管部者雖各使欲借以自重而交涉事務出好與戎所關甚鉅以親信重臣當之與國家休戚相關自不至輕心誤事况總理衙門本有親王兼管係屬舊例似可照行外務部冠六部之首係倣西洋各國成式至請將外務部諸臣予以厚祿俾得專心辦公亦尙近理如蒙俞允將外務部堂官定爲額缺其章京等亦應分設數司倣照六部司員之例卽於總理衙門章京內選派開去原衙門差缺改爲外務部司員將來應如何考充升轉並籤分學習之處應請旨敕下督辦政務處大臣會同吏部妥議具奏司員如何分任職事各使原不過問惟必須豫爲部署庶幾一經改章堂司俱備規模整肅免致再被刺譏日使原文多有費解之處是以未經全叙摺內除將原照會鈔錄咨送軍機處備查外所有議改總理各國事務衙門爲外務部緣由理合恭摺由驛具奏伏乞皇太后皇上聖鑒訓示謹奏光緒二十七年三月二十六日



(四五七一)湖廣總督張之洞來電

光緒二十七年四月初八日到  
電報檔

英參贊傑彌遜奉其薩使命自京來見兩次傑商賠款事問鄂省意見答以中國力竭須減數減息寬期傑云英深知中國力竭須減數減息寬期傑云英深知中國情形不願竭中國財力商辯語甚多昨日接薩使復電云按原數四百五十兆四釐息不能減亦不索現銀改爲三十年攤還每年應攤還二千六百萬兩洞查西人計算本息表內數目相符懇其照薩使前說減息爲三釐三毫或三釐半傑云英輕息可借他國不能借英當勸各國或能略減然不能定又商加稅事傑述薩使云除洋藥不加外可加至值百抽十按貨本運費鎊價核實合成銀數並云有數種物向無稅今可納稅蓋指洋人自用物而言但須進口洋貨出口土貨釐金全免問鄂省以爲可行否答以鄂省一人私見以爲可行蓋約計洋關稅加至抽十歲可增一千六百萬兩以外進口洋釐出口土釐約計六七百萬兩兩釐均免關稅必旺必可歲增一千萬至出口土貨免釐乃富民勸工之本原與外國通商之要義各國出口土貨大率無稅在我本當舉行今藉以增交關稅更爲有益傑又問抵款事歷舉鹽漕常稅等項答以加稅約抵一千萬鹽課釐約一千一百萬如息略減所差不多當另籌惟鹽務只可

作抵斷不能交外國人代辦此乃干預我財政傑述薩使云不必交外人代辦英不願干預中國財政言之再三語甚明確傑又云加稅事牽涉釐金且關涉通商行船新章猝難議定此時不能以此作抵答以只須查明確係進口洋貨出口土貨即免抽釐一言可決有何難議傑又云常稅可交海關代辦否答以常稅亦只可作抵不能交海關代收蓋中國常稅船鈔子口分卡甚多皆在內地遠者或至數十里外若稅司代收多與民人交涉局卡紛繁即是干預我內政湖北三洋關皆無常稅此乃爲大局計傑力辯乃爲我謀生財非干預洞仍堅持敵處問各節已告全權否傑云渠出京時未告全權此時不知已託傑將各節電復薩使並懇減息傑今日東下見江督竊謂總數四百五十兆一節難商減然較前說九百兆之數已省一百二十兆利息一節若能減息半釐歲可省二百餘萬薩使既略有活動語氣只可姑與一商並託美國調停洋關抽十免釐一節管見以爲此是美政彼此有益但不知各省意見如何加稅作抵一節如能再與切商照允庶免羅掘無術鹽務作抵一節旣言明由我自辦似可作抵至常稅交海關代收一節萬不可行惟必當認真整頓此因薩使來詢故就管見答之應請樞廷與全權裁奪籌商請代奏之洞遇辰

(四五七二)軍機處擬致奕劻李鴻章電信

光緒二十七年四月初八日  
電寄檔

頃接鄂督遇電言與英參贊傑彌遜晤商各節已另由盛宗丞轉京諒已達覽所商減息英允勸各國略減及洋關抽十釐實鎊價並向無稅之洋食用物可納稅但須免釐一免一加可歲增鉅款英既有活動口氣自應趁此切商鹽務由我自行整頓既稱英不願干豫中國財政不交外人代辦自可作抵常稅不便交海關代收所有各節應請尊處與各使切實商論如將加稅作抵一層再能商允更好更請婉商寬展一二十年則財力可少紓現在期限已迫務望從長規畫迅速商定電復爲盼樞庚

(四五七三)留京辦事大臣崑岡等請卽日定期回鑾摺

光緒二十七年三月二十五日  
光緒二十七年四月初九日到

留京辦事大臣大學士臣宗室崑岡等跪奏爲合詞籲懇定期回鑾以順輿情而昭宸斷恭摺瀝陳仰祈聖鑒事竊臣等伏讀光緒二十六年閏八月初三日暨二十日兩次諭旨仰見皇太后皇上於根本重地慎始圖終權衡至當何待臣下再三陳請上瀆宸聰惟念自鑾輿西狩以來瞬經數月京師軍民百萬西顧徬徨依戀之忱岌岌不可終日至大小商販雖經

陸續開市其實並未添置貨物意存觀望不僅畏懼折閱但欲探明回鑾遲速以決商務去留此等情形實與都城安危之機大有關係伏查上年變生倉卒可謂創鉅痛深自洋兵麇集以來雖城闕殘毀府庫空虛百姓流亡闔闐瓦礫三百年間所經營儲積者一旦傾倒無餘論者謂元氣大傷難於規畫臣等以爲禍爲福所倚剝乃復之機京中制度經列聖締造矩矱猶存果使內外大小臣工仰體上年十二月初十日諭旨或因或革或損或益通變自強實事求是中國地大物博十年生聚十年教訓殷富繁盛可復舊觀中興之機實基於此臣等並聞近以俄約未畫各國無所效尤德兵雖強已允不入晉境祇以環球互相牽制轉激成顧全中國之情亦見各國與我和好之心尙屬可信全權大臣慶親王奕劻大學士李鴻章現與各使續議擴充使館酌給賠償及大綱內應辦各事卽責其交還地面撤退聯軍現據德使函稱於三月十三日交還總理衙門已經該衙門王大臣接收又探聞各使俟聯軍撤後雖酌留護館之兵而爲數無多均退紮於使館左右並云於鸞輅還京沿途不見一洋兵洋將此則各使喁喁瞻就之忱猶似顧全睦誼其未便自行陳請駕旋欲將回鑾大計留待皇太后皇上宸斷獨伸也誠於此時定期啓蹕宣布中外藉坦示而維繫之以免各使日久積成干預之思託詞籲請許之則有傷國體却之則適啓猜嫌於事轉多窒礙伏願聖

心獨斷趁茲月令融和卽日擇定吉期下詔回鑾計四月中旬啓蹕端陽節後聖駕可以抵京沿途並不至有大雨溽暑之虞如蒙俞允自當由全權大臣奕劻李鴻章商令各國安定交地撤兵日期在各使當無閒言儻或至四月杪洋兵仍未撤盡不妨於乘輿所經省會之地暫行駐蹕飭下全權大臣責令洋兵速撤以示萬全庶天下臣民咸曉然於皇太后皇上上保國權下安黎庶之至意宗社幸甚天下幸甚臣等無任翹企待命之至謹合詞恭摺具陳伏乞皇太后皇上聖鑒謹奏光緒二十七年三月二十五日留京辦事大臣大學士臣宗室崑岡留京辦事大臣協辦大學士臣崇禮留京辦事大臣吏部尙書臣宗室敬信現赴（行在）留京辦事大臣兵部尙書臣裕德留京辦事大臣理藩院尙書臣宗室阿克丹留京辦事大臣吏部左侍郎臣宗室溥善留京辦事大臣戶部右侍郎臣那桐留京辦事大臣順天府府尹臣陳夔龍

（四五七三）附件一 崑岡等請飭袁馬兩軍務嚴紀律片

再臣等前因京中土匪乘機竊發搶劫之案層見疊出當各國兵隊分段駐紮此輩尙復明目張膽毫無忌憚一旦洋兵盡撤城恐土匪勾結亂民餘黨再肆紛擾當於上年十二月初

九日咨商全權大臣慶親王奕劻大學士李鴻章暨步軍統領衙門順天府五城御史於洋兵未撤以前當豫籌徵兵保衛之法旋經咨覆各在案嗣聞慶親王奕劻大學士李鴻章會請飭調山東巡撫袁世凱武衛右軍三千餘人專駐內城地面並請調馬玉崑所統八營分紮四路應以資聯絡等因當經奉旨允准臣等擬請飭下該軍務選節制之師令帶兵各員嚴申紀律勿蹈軍營騷擾積習庶都城灰燼餘生得獲保全矣臣等爲肅清畿甸支撐大局起見謹附片陳明伏乞聖鑒謹奏

(四五七四)慶親王奕劻大學士李鴻章來電一

光緒二十七年四月初九日到  
電報檔

賠款一事養電所擬辦法因海綫斷得復少遲各使催急卽照前議繕發減數屢晤各使竭力商酌均不肯允美使所稱三萬一千萬據云屢商各國不允似美廷借此討好並無實在把握頃聞各使會議已有照會邊德穆使過晤與談減數彼云美兵少且早撤故允減別國斷不能比必以四萬五千萬爲定數若遲則兵費須加我們可先密商倘貴國允定賠款四萬五千萬加息四釐但有諭旨爲憑德國必撤兵各國亦必隨撤嗣後如何分年酌還本息可徐商辦法如無現銀改給股票德可允從他國現尙未議及此然英美已默許現議撤兵

節令正好若交炎暑便不能撤須遲至九月十月以後又須多添兵費爲中國計實不合算問將此議照復德兵先撤不至失信否穆謂我可擔保鴻等昨晤瓦帥亦盼賠款速定可速撤兵去而領銜葛使照會已至據照稱所擬按月攤還總數僅足賠款之本並未算及利息應請再行酌核將中國國家於此事如何主見從速示復等語雖虛渾其詞與穆使面稱各節相符今兩宮急盼撤兵方議回鑾若不速定見瓦帥暨德兵不肯先撤各國必更觀望遲一日則多費百萬至秋後須多賠一百餘兆德使既輸誠於我不宜過與磋磨致誤機會乞速代奏覈准施行奕劻李鴻章陽成

言四(四五七五)慶親王奕劻大學士李鴻章來電二百光緒二十七年四月初九日到

羅使陽電瀾候以賠款一節英勸各國受中國債票不折不扣如西歷四月初一日各使所交約單百七人能早復較易爲力云所云約單即指外省應辦罪各員也請代奏奕劻李鴻章庚

(四五七六)軍機處電寄奕劻李鴻章諭旨光緒二十七年四月初九日

奉旨陽電悉各國賠款共四百五十兆四厘息著卽照准以便迅速撤兵惟中國財力防有此數務須將本利核定總數寬展年限力與磋磨爲要欽此四月初九日

(四五七七)軍機處擬致奕劻李鴻章電信

光緒二十七年四月初九日  
電寄檔

賠款正數業經奉旨允准自可迅速撤兵昨鄂督電想早達覽所稱英參贊傑彌遜述薩使言四百五十兆四釐息三十年攤還每年應攤二千六百萬兩此語是否屬實此次償款過巨縱悉素敵賦亦恐不敷既有分年酌還本息徐商辦法之言鄂督言減息英有活動口氣希先極力磋商冀可略減息銀必不能減再宣諭旨請酌惟必須徐商寬展年限庶可少紓財力諸賴大力勉爲其難設法磋磨實所企禱樞青

(四五七八)軍機處擬致張之洞電信

光緒二十七年四月初九日  
電寄檔

遇電據英參贊述薩使云賠款四百五十兆四釐息三十年攤還每年應攤還二千六百萬兩本利究係如何算法希詳晰電復樞青



(四五七九)軍機處擬致盛宣懷電信

光緒二十七年四月初九日  
電寄檔

各國共索償款四百五十兆兩德美兩國前得電已知確數日本會言較俄德法為少並謂俄索償費湊一萬七千盧布但不知合銀若干請查示英謂不及十分之一法並無確數曾處必可探悉希設法將俄日英法索償確數探明電示為要四月初九日

(四五八〇)軍機處擬致英德日本羅裕李各使電信

光緒二十七年四月初九日  
電寄檔

各國共索償款四百五十兆兩現商減息寬期德美兩國所索各有確數希貴大臣設法將該國索償若干確數探明電知為盼四月初九日

(四五八一)慶親王奕劻大學士李鴻章來電

光緒二十七年四月初十日到  
電報檔

新授河南布政使陳夔龍現隨臣等辦理議款擬暫留京數月藉資臂助俟議款稍定再行飭赴新任乞代奏奕劻李鴻章佳

(四五八二)會辦商務大臣盛宣懷來電一

光緒二十七年四月初十日到  
電報檔

俄領事面稱俄賠連商民共七千六百萬兩聞總數四百五十兆各國商民教賠款均在其  
中比較甲午只多一倍似難商減惟有四端須請全權力持定見一分立債約交與各國國  
家其商民賠款若干卽由該國轉給二各國如有需用現銀者請該國自籌中朝萬難再向  
銀行借款免受現扣重利之害三各使劉那徐周言每年一千五百萬兩則須六十年方能  
攤完雖仍合九百兆利不及三釐似以此法爲最輕便京電又云按四釐算每年須納利一  
千八百萬兩彼原請每年還千萬兩三十年完計周息三釐三毫四釐之說似可不允四抵  
款萬不可推諉全權所告鹽課釐一千萬常稅三百萬釐金二百萬除常稅應歸海關併收  
外課釐仍援前案各省交海關轉給不致干預財政此最簡捷南洋不願指鹽但慮其干預  
耳至加稅事將來必可辦到必能暗抵此次賠款宣不敢請在此時輕發者恐受其挾弄耳  
宥電謂爲數甚微反礙以後議加地步一語破的萬分欽服宣懷庚

(四五八三)會辦商務大臣盛宣懷來電二

光緒二十七年四月初十日  
電報檔

青電謹悉俄日英法索償確數容再探明電達四百五十兆賠款如經許四釐息每年還二  
千萬共需本利壹千兆以內似可先還息三釐三毫係照其所索三千萬分三十年之息計

算但請將三千萬改作二千萬寬展年限如得允則便宜甚鉅乞鈞裁宣懷佳

(四五八四)會辦商務大臣盛宣懷來電三

光緒二十七年四月初十日到  
電報檔

四百五十兆息三釐三毫分三十年攤還每年須還三千萬傑彌遜索四釐分三十年每年二千六百萬恐有錯誤宣懷佳

(四五八五)會辦商務大臣盛宣懷來電四

光緒二十七年四月初十日到  
電報檔

各國所索四百五十兆本數已允准又所索三千萬分攤三十年核利三釐三毫零息數似亦可照原議但請改爲每年攤還二千萬仍照三釐三毫零核算至本利還清之年爲止此最了當似可先商乞鈞裁代奏宣懷佳

(四五八六)軍機處電寄奕劻李鴻章諭旨

光緒二十七年四月初十日  
電寄檔

奉旨陽電悉償款四萬五千萬各國既不允減尙可照准惟前奏開索息一倍計合三釐三毫零仍照此商減爲要中國財力已竭各國皆所深知並須展寬年限方能勉籌著卽迅速

商定以便早日撤兵欽此四月初十日

(四五八七)軍機處擬致盛宣懷電信

光緒二十七年四月初十日  
電寄檔

准兩電均進呈賠款四百五十兆本息合計之數總期一目瞭然應仿照西人計算本息表式將息銀三釐三毫或三釐半或四釐及分三十年五十年攤還各編一表分別覈算詳晰開明迅卽由驛飛遞咨送本處以便進呈切盼樞蒸

(四五八八)軍機處擬致奕劻李鴻章電信

光緒二十七年四月初十日  
電寄檔

償款正數已奉旨允准惟息銀仍請照前電本息併計九萬萬合息三釐三毫商辦爲要且英參贊與鄂督言英薩使有略可減息之語俄領事有不須四釐之言似尙不難就範卽按此數若卅年攤還每年需銀三千萬實屬財力不及惟有每年勉籌二千萬展寬年限至本利還清之年爲止較爲妥善德國旣允償款定議卽可撤兵今正數照允能將減息寬期緩商先請撤兵爲妙再俄德兩國皆稱償款係併商民教賠款在內將來債約自應註明諸賴大力勉爲其難設法磋商早日定局爲禱再此次直境洋兵各處勒索銀錢爲數甚巨德兵

官曾有可歸入償款計算之言可否於定議時將此層聲明將來查明作抵亦可少紓財力  
並祈留意酌辦樞蒸

(四五八九)慶親王奕劻大學士李鴻章來電

光緒二十七年四月十一日到  
電報檔

賠款減息一節或云可減爲三釐半穆使謂各國借債總在四釐上下日本已六釐是四釐  
斷不肯少英薩使亦持此論且謂不折不扣已算便宜難再磋磨幸勿爲浮言所惑致誤事  
機請代表奕劻李鴻章卦

(四五九〇)湖廣總督張之洞來電一

光緒二十七年四月十一日到  
電報檔

青電祇悉四百五十兆四釐息三十年攤還每年應攤二千六百萬零二萬三千五百兩係  
先按利隨本減辦法算出後再分三十年勻攤合得此數西人有算定各等利息之表息幾  
釐分幾年一還每年攤幾何印有成書敝處查閱無誤因款鉅故零數未開若分四十年查  
表每年應攤二千二百七十三萬四千兩總數合九百零九兆有奇分五十年查表每年應  
攤二千零九十四萬七千五百兩總數合一千零四十七兆有奇英參贊本言按五十年攤

還每年還二千零九十四萬有奇鄙意嫌總數太多後數日薩使電改爲三十年攤還每年二千六百萬查表相符故據此上聞此皆出自薩使之意敝處但答以當商政府及兩江並未置可否遇電所謂英使有活動語氣者專指減息而言若二千六百萬之數只可商減不至再增息減則每年不須二千六百萬矣若肯減息則多攤年限方爲有益故今日惟以商懇減息爲要義至各國分寫債票薩使已言之合併聲明再各國宜總議不宜分議若分議將來於俄約有礙至要之洞肅佳

(四五九一)湖廣總督張之洞來電二

光緒二十七年四月十一日到  
電報檔

傑彌遜述薩使言賠款不可令各國公保恐干預中國財政故特遣該參贊來商不索現銀各國分寫債票之法此係要語特補達再若分五十年每年還二千零九十四萬餘兩本利共一千零四十七兆有奇卽是四釐息傑彌遜面言查表符合前佳電已詳傑並面言此係每年以一千八百萬兩作爲付四釐之息其餘係以半釐有零還本等語西人算法精密彼自以爲四釐我不可以爲二釐半也若誤認重息爲輕息此語一出外人藉此將錯就錯仍按四釐算足矣萬分緊要傑現在金陵見江督一切必已面談請鈞處電詢之洞肅卦亥

(四五九二)軍機處電寄奕劻李鴻章諭旨

光緒二十七年四月十一日  
電寄檔

奉旨卦電悉各國償款四百五十兆四釐息應准照辦欽此四月十一日

(四五九三)軍機處擬致奕劻李鴻章電信一

光緒二十七年四月十一日  
電寄檔

償款四釐息已照來電奉旨允准頃鄂督電稱傑彌遜述薩使言宜各國分寫債票不可令各國公保恐干豫中國財政卽按四百五十兆四釐息分年攤還英國有算定攤還本息表卅年攤還每年合銀二千六百萬零四十年五十年合銀若干均載明可向滬購覘查閱不可誤認重息爲輕息拘泥四釐息錯算設外人將錯就錯則所增甚巨等語特此電聞至如何指抵如何分年總祈就中國財力細覈妥籌俾還款時不至萬分爲難又滬俄領事有俄東三省公司暗虧之款尙須於另約索賠此說果確自應妥商併議在內免公約定後又生枝節是爲至要樞真

(四五九四)軍機處擬致奕劻李鴻章電信二

光緒二十七年四月十一日  
電寄檔

元電已進呈薩使刁難不撤兵有無別故他國不至效尤否廷會試全停與條約城鎮之言不符能託美日使居中轉圜否劉撫等事商減輕者又何改變來咨未到昨電商擬續議各員計已到能否照辦望擇要電復償款照允四釐息卅年攤還本隨息減共合七百八十兆兩每年攤二千六百萬計鹽漕常稅土稅釐等項似敷指抵若多攤年分雖每年稍少而總計更多諸祈妥酌商定尤望趁此妥商民教專約總期持平相安以防後患爲要樞咸

(四五九五)慶親王奕劻大學士李鴻章來電

光緒二十七年四月十三日到  
電報檔

奉蒸電旨謹悉查按三十年以賠款四萬五千萬周息四釐核算計共息銀五萬四千萬各使前擬按一倍加息四萬五千萬較可省銀九千萬故合三釐三毫有零之數然此數呆板算法若於付款之法及每年設法挪展雖認息四釐將來所付息銀至清款時轉可少於四萬五千萬之數則本息總計尙可不至九萬萬英薩使曾告徐壽朋言每年付銀二千六百萬三十年本息可以清款總計共銀七萬八千萬較原擬九萬萬已少一萬二千萬總之遞年付本便可遞年減利付息之多寡視所付之本爲衡宜核算總數大處落墨僅於毫末間爭之無益也今午派徐壽朋往見德穆使遵旨與商減息穆稱按現在各國借債四釐已減



讓到家萬難再減告以英參贊傑彌遜在湖北張之洞稱三釐半可商辦英既可商德亦可減少穆稱未聞薩使談及此言不可信又稱瓦帥已奉本國政府訓條料理撤兵專候中國認利准信以定行止伊亦奉到訓條四釐一毫不能減如欲商議則撤兵之期必改遲交盛暑即不能撤又與商及付款年期辦法穆謂此可從容商議刻下撤兵之事最關緊要一言可決在四釐允與不允而已專候諭旨無煩多言等語查德提督瓦德西爲聯軍統帥德兵在直隸最多各國兵皆視德軍爲轉移德兵不撤各國兵皆觀望再遲數月非但兵費須增難免不生枝節英美德均稱息非四釐不可傑彌遜所言似係隨口敷衍輕信必至誤事撤兵一節爲兩宮回鑾遲早所係亦爲國家安危大局所關且於畿輔數百萬生靈苦樂大有關係且洋兵在境於官軍剿匪農民耕種均有妨礙仰祈聖明宸斷俯准所請大局幸甚請代奏電復奕劻李鴻章真

(四五九六)南洋大臣劉坤一來電

光緒二十七年四月十三日到  
電報檔

全權文電賠款四百五十兆兩息四釐已奉旨照准如何分年籌付及以何項作抵尙待商酌傑彌遜無權議事在鄂所言不可信應由尊處酌量答復云現復以傑對鄂言分三十年

攤還四厘息每年還二千六百萬零共還七百八十兆零係憑薩使所電之數傑來敝處更有薩使照會敘明第六等條應行議辦之端現派傑參贊代本國國家暨本大臣前往江甯面商該員與本大臣時相函電所囑代商各件請推誠論說如有擬辦之端亦祈明告寄京等因是傑來確有商辦之據所言還數與鄂電同再三詢商謂確實無錯且將共還七百八十兆零總數筆之於書自應將傑言之數質於薩使已先後電達乞核辦云合電聞劉坤一錫

(四五九七)軍機處進呈日本貴族院議長來信片

光緒二十七年四月十六日  
上諭檔

據李盛鐸寄到日本貴族院議長公爵近衛篤磨致臣榮祿王文韶書各一件意在糾合日本官紳聯絡中國以拒俄人謹將原信恭呈御覽謹奏四月十六日

(日本議長來信二件原缺)

(四五九八)軍機處擬致崑岡等電信

光緒二十七年四月十六日  
電寄檔

面奉諭旨近日疊據京師大小臣工籲請回鑾在諸臣情殷依戀具見惻忱朕恭奉慈輿暫

駐關中眷懷宗社寤寐難安亟欲早日回鑾上妥九廟之靈下慰臣民之望前已諭催奕劻李鴻章迅定公約俾洋兵早退卽行定期回鑾並令傳諭官紳商民知之著崑岡等再將此意傳旨一體曉諭俾衆共知所有內廷及各衙門應行豫備之處並著分別傳知早爲料理欽此樞鈑

(四五九九)軍機擬致奕劻李鴻章電信

光緒二十七月十七日  
電寄檔

頃接初四來咨及鈔寄照會均悉各使所稱徐繼畲等十一員罪名未先定斬候並前浙撫劉浙臬榮均固請照原擬重降諭旨而所叙應減應免各員又語多含混誠如大咨豫留日後變卦地步似此情形實難著手只可從權變通辦理現請旨將其指出之十一員照所請虛擬斬候卽叙明貸其一死改發極邊云云由尊處酌擬諭旨照會各使俟其如何答復再定以後各員處分仍祈妥酌辦理一面示復除榮銓昨接十一電薩使已允除去永不釋回外惟劉撫能不叙查鈔方好仍望將真電所商各員迅速設法商明電示以便降旨了案並停試磋商能否轉圜早日定議撤兵免日久又生枝節爲要樞洽

(四六〇〇)慶親王奕劻大學士李鴻章來電一

光緒二十七年四月十八日到  
電報檔

奉真電旨卽照會德穆使頃據照復大皇帝降旨允償聯軍兵費等銀四百五十兆加利四釐聯軍總會部瓦師卽撤僅留一枝約數千人等語穆使會言保定京城兵先撤其數千人均係暫留天津債票辦法可商抵款年期尙待酌議請代表奕劻李鴻章咸

(四六〇一)慶親王奕劻大學士李鴻章來電二

光緒二十七年四月十八日到  
電報檔

初四日爲各使照會請重降諭旨所發咨文計已得達茲再聲明各使來文汾州府知府徐繼儒忻州知州徐桂芬和林格爾通判毛世黻托克托城通判樊恩慶寧遠州司獄李鼇和署歸化城同知郭之樞前武邑縣知縣張秉詰盛京副都統晉昌巴彥蘇蘇統領鄂英衡州道隆文金衢嚴道鮑祖齡共十一員應照原擬斬監候如貸其一死極輕當發往極邊永不釋回請重降諭旨等語今早因議賠款晤薩使據稱伊國家於此事甚爲着意請速查照原文酌辦劉樹堂事與薩再四商論可免查鈔仍請交地方官管束榮銓前已允刪除永不釋回四字至張秉詰於署清苑任內已革職永不叙用武邑滋事並不在任仍應扣除薩謂只要停考及懲辦外省禍首二事辦結卽行撤兵並無他故停考昨已由驛奏結廷會試已允

不停奏到請卽降旨懲辦事可否候咨到酌請降旨一面由電示知以便催其撤兵請代奏  
奕劻李鴻章篠

(四六〇) 慶親王奕劻大學士李鴻章來電

光緒二十七年四月十九日到  
電報檔

咸電悉英薩使所擬每年付銀二千六百萬兩三十年賠款本利全清雖總計付息較少但財力實難周轉查俄法英德各債須光緒六十九年始能還清若添新債過多無法騰挪今早與專辦賠款之德英法日本四使會議告以每年一千五百萬分五十年前三十年付本後二十年還利各使謂欠利太久斷不能行旋以四十年清還每年付銀二千零四十餘萬辦法與商取表一紙示之照表分年攤算前十年雖付利較少後三十年本少利減而所付銀數仍同以後補前各國亦不喫虧各使謂前十年少付之利應再行加利告以利上加利斷不可行各使云伊等有一辦法四十五年清款明早算一表來許以送到再酌賠款但不欠息彼卽無詞惟前數年若只付息則本銀絲毫不減而利銀已付數千萬兩大不合算總以付息抵本年分略寬財力得抒而總計息銀數目仍不過鉅容與竭力磋磨爭得一分是一分隨時電商辦理慶李篠二

(四六〇三)會辦商務大臣盛宣懷來電一

光緒二十七年四月十九日到  
電報檔

奉青電轉詢徐京卿周藩司頃據電復如下卦電悉賠款至西三月底止計美五兆英六兆德十二兆俄十七兆九日本四兆八義二兆八比一兆二奧五十萬荷十萬日六萬以上均係磅數法二百六十五兆佛郎至六月底止每月共加二兆磅據會部郎廣銓所探如此俄鐵路暗虧另議據俄使稱並無此說希轉達馥明元云宣懷咸

(四六〇四)會辦商務大臣盛宣懷來電二

光緒二十七年四月十九日到  
電報檔

青電轉飭駐京鐵路譯員向各使署查探索償確數頃據電復如下各國賠款確數查明如下俄一萬三千二百萬日本三千五百五十萬法七千五百萬德九千一百萬美三千四百萬英五千一百六十萬意二千五百九十萬比八百三十萬奧四百萬荷蘭八十萬大西洋並代理國三十八萬以上均中國兩數云宣懷咸

總數共四萬萬五千八百四十八萬兩

(四六〇五)南洋大臣劉坤一來電

光緒二十七年四月十九日到  
電報檔

此次與各國議和必須合議不可分議爲最要宗旨賠款四百五十兆已定以俄款爲最多本有東三省賠款在內現在瓦德西出京兵隊兩禮拜後全撤則東三省俄隊亦應撤退庶合情理應請電飭全權照會領袖公使詢商俄兵在東省者何時撤回一面由全權電致三將軍預籌接收辦法以免延誤且看俄使如何答復再行籌度辦理請酌裁坤皓

(四六〇六)慶親王奕劻大學士李鴻章來電

光緒二十七年四月二十日到  
電報檔

治電令從權變通辦理遵卽恭擬諭旨照會各使文曰四月十七日內閣奉上諭前因盛京副都統晉昌巴彥蘇蘇統領鄂英湖南衡永彬桂道隆文浙江金衢嚴道鮑祖齡山西汾州府知府徐繼孺忻州知州徐桂芬署歸化城同知郭之樞和林格爾通判毛世黻托克托城通叛樊恩慶寧遠州司獄李鳴和等縱匪仇教致釀事端降旨將晉昌鄂英發往極邊充當苦差隆文等發往極邊永不釋回該員等獲咎甚重本應按律擬斬監候既經朝廷加恩貸其一死改發極邊已屬從輕辦理著刑部查催迅速定地發配毋任延宕至浙江巡撫劉樹堂前已革職永不叙用飭令回籍仍著交地方官管束以示懲儆欽此內除榮銓張丙詰二

員業經商明毋庸贅叙外餘均查照原照會大意似已滿其欲儘可不必答復請卽由行在京城兩處發抄至真電所商並業經照會未復各國現今徐壽朋周馥詳細開單與各使磋商俟覆到再行詳細電聞以便降旨似不待全案了結卽可撤兵停試奏到仍盼電示請代奏奕劻李鴻章效

(四六〇七)軍機處電寄奕劻李鴻章諭旨

光緒二十七年四月二十二日  
電寄檔

奉旨諭奕劻李鴻章現已定期回鑾京師各使館酌留兵隊前據奏各國統計不過數百名究竟確留若干使館租界逼近禁城聞有築城設礮臺之說曾飭電詢並令設法商阻著卽電復又鐵路亟應收回俾免火車入城津京沿途洋卡洋兵酌留數目以少爲妥以上各節均關緊要該王大臣務須切實商定一面先將情形電奏爲要洋兵撤後地面匪徒尤須嚴防查拏毋稍疏虞以昭肅靜欽此四月二十二日

(四六〇八)慶親王奕劻大學士李鴻章奏陳迴鑾蹕路情形摺

光緒二十七年四月十一日  
光緒二十七年四月二十四日



全權大臣和碩慶親王臣奕劻大學士直隸總督臣李鴻章跪奏爲敬陳迴鑾蹕路情形恭摺仰祈聖鑒事竊自慈輿聖駕西幸長安天下臣民莫不延頸企踵以望迴鑾之一日臣等躬膺鉅任內不能早塞羣望外不能撫輯諸邦慚悚焦勞難安寢饋茲款議粗有端緒益深瞻就之誠惟奉慈馭以經臨必相度山川避險阻而趨安便今自陝西以達京師若由山西舊路爲程二千五百四十里惟晉省頗見災荒恐傷聖天子勤卹民生之隱山路亦甚崎嶇若由西安東出潼關入河南以達京師爲程亦二千數百里沿途平坦較西路爲便然自入直隸磁州以迄定州計程六百二十五里應分十二站中隔大小河二十餘道均無渡船必須趕搭橋座而正定城外卽滹沱河冬令水涸一杭可渡趕搭橋筏尙易爲功夏秋水漲泛濫幾及十里之寬流沙無底不能建造橋梁船隻又少人力難施未敢請駕竟渡至尖宿處所自磁至定經過城池村鎮迭遭拳匪洋兵潰勇土匪蹂躪之後民間房屋多被焚拆絕少完善之區必須逐站興建完工需時其定州以北荒災情形相同但有鐵路可通千乘萬騎如蒙派分起數先後行走兩日卽抵都城此陸路逕達之大概也若由河南衛輝改道濬滑水路直達天津爲程一千六百餘里順流而下舟行甚安應令直東豫三省先期調集船隻在道口豫備應用過天津後或乘原船送抵通州或改火車逕抵都下火車半日而達固極

迅利卽舟行亦數日可達伏念皇太后皇上由西安啓鑾直至定州陸程五十餘站高年遠邁暘暑長征諸多未便似水驛較爲便逸但經由天津各國官商不免在途瞻謁我皇太后慈育仁煦已四十稔我皇上誠孚德感遍五大洲旣各修好而釋兵自更致敬而盡禮至水程所過隨扈兵勇皆循例由兩岸夾護而進隨地支帳巡查亦昭敬慎此半由水道前進之大概也以上兩路情形不能不於事先請旨酌定以便敬謹籌辦理合繕摺預爲陳奏伏乞皇太后皇上聖鑒訓示遵行謹奏光緒二十七年四月十一日

(四六〇九)慶親王奕劻大學士李鴻章來電

光緒二十七年四月二十四日到  
電報檔

嘯電垂詢日本優榮之典如何辦理令卽酌擬查前駐使西德已商請派侍郎那桐現使小邨又云已電商該外部擬請旨卽行酌派能否賞加頭品頂戴以示寵榮至養電垂詢各節查京師各使館酌留兵隊現尙未定數租界擴充業經定議彼擬築城自固並未聞設礮台之說如有其事自應商阻察看日本美兵官護禁城嚴禁中外人出入十九夜武英殿之災救護甚力幸未延燒其忠於爲謀卽此可見鐵路兩條蘆漢暫係法國代管津榆暫係英國代管彼因洋兵尙未盡撤便於往來起見已屬俟回鑾時小心伺應斷無他慮並已勒限三

月接路至正定及搭造滹沱河浮橋津榆火車前德國經營時已入城至天壇門外英人尙欲另開車路以避天壇京津沿途洋卡聞留三四處每處派兵三百至洋兵撤後地面匪徒尤須嚴防查拏除分令步軍統領五城各派人接替外又電催姜桂題所部剋期來京以資分撥又奏請派胡燏芬襄辦京畿善後聯絡巡防想荷兪旨請代奏奕劻李鴻章漾

(四六一〇)軍機處擬復出使日本大臣李盛鐸信

光緒二十七年四月二十四日電寄盛

逕啓者前承轉寄日本國民同盟會友惠書發緘伸紙罄欬如親具仰近衛公爵領袖名流盱衡全局同會諸君子閱識偉抱彪炳一時剴切指陳洞中窾要極荷輔車之誼爲據借著之籌其所以惠愛中國者甚肫且厚此誠仁人君子之用心而亞東志士所爲延頸踵思慕而不能自己者也夫以中國遭時多難猝啓兵戎事變無窮殷憂未已誠有如來書所云者幸賴諸友邦調護之力和局就定四境之內得以盱安從此槃敦言歡推誠相與壤地密爾休戚同之尤所感幸榮等承乏樞密上貽宵旰之憂疚心無地迺蒙獎借祇益慙惶所示銳修內治諸大端比已稟承宸訓次第變通忠告良言書紳銘佩不敢不勉祈轉達近衛公爵暨同會諸君子申致答謝之忱恕不專啓卽頌大安四月二十四日

(四六一一)慶親王奕劻大學士李鴻章咨會鈔送與日國葛使來往照會及節略咨

文

光緒二十七年四月十六日  
光緒二十七年四月二十五日到

欽命全權大臣便宜行事管理總理各國事務衙門和碩慶親王欽差全權大臣便宜行事  
太子太傅文華殿大學士北洋大臣直隸總督部堂一等肅毅伯李爲咨會事竊照本年二  
月十一日各使開送停考五年清單一事現經本王大臣具摺請旨所有與領銜葛使往來  
照會及分送各使節略自應鈔送貴處備查除開單具奏外相應鈔錄照會節略備文咨送  
貴處請煩查核須至咨者計鈔件右咨行在軍機處光緒二十七年四月十六日

(四六一一)附件一 與日國葛使來往照會及節略

照錄日國葛大臣照會二月十一日到

爲照會事照得西歷一千九百年十二月二十二日即庚子年十一月初一日會定中國皇  
帝應允各條款施行一事查該款第二條末段有諸國人民被戕害陵虐之城鎮五年內概  
不得舉行文武各等考試之語茲經諸國全權大臣開列上開應停考試各城鎮之冊請爲

轉奏頒發諭旨一道昭示冊內所指及另有諸國人民被戕害凌虐之各城鎮務停文武各等考試五年之禁由本領銜大臣代爲粘送卽請照辦可也須至照會者一千九百一年三月二十九日辛丑年二月初十日

應停文武各等考試之處清單

山西省 太原府忻州太谷縣大同府汾州府孝義縣曲沃縣大甯縣河津縣岳陽縣朔平府文水縣壽陽縣平陽縣長子縣高平縣澤州府隰州蒲縣絳州平遙縣潞城縣潞安府洪洞縣歸化城綏遠城

河南省 南陽府河內縣鄭州光州陳州府濬縣內黃縣彰德府太康縣襄城縣西華縣

浙江省 衢州府

直隸省 北京順天府保定府永清縣天津順德府望都縣獲鹿縣新安縣通州張家口朝陽縣東安縣滄州冀州遵化州武邑縣景州灤平縣河間府

山東省 泰安府臨清州

東三省 盛京甲子廠連山于慶街北林子呼蘭城

陝西省 甯羗州

江西省 鄱陽縣

湖南省 衡州府清泉縣

照錄致日國葛大臣照會二月十四日

爲照復事光緒二十七年二月十一接准來文內開照得西歷云云卽請照辦可也等因准

此查停止文武考試係按照上年會定和議總綱第二款末段應辦之事該款所載五年內

概不得舉行文武各等考試係專指諸國人民被戕害陵虐之各城鎮而言本王大臣上年

十一月送去說帖曾經敍及各府廳州縣所管城鎮甚多應查明何城何鎮地方如有戕害

陵虐諸國人民之事自應照辦此項自指本地歲科試而言至鄉會試係各直省合考內如

有戕害陵虐諸國人民之城鎮應仍照前項查明分別辦理其他別城鎮並無干涉者仍應

照常考試以示勸懲等語諸國全權大臣自己早經察及茲閱此次清單內開列停考之處

俱指稱某府某縣並非某城某鎮與第二款末段原文所載大有出入比如一縣所屬內有

一鎮有虐害他國人之事祇應停此一鎮之考而不能將闔縣考生概予停試至於一府所

屬總有數縣此縣與彼縣相去頗遠尤未便以一城內應行停考遂併一府而均停之似於

情理未協如謂考試自府縣始並無專爲一城一鎮之考試故停考祇可就府縣言之此非

深知事實之語也該府縣考試時但不准停考各城鎮之考生報名此外仍准照常預考甚易區別卽說帖內以示勸懲之意若因一城一鎮莠民滋事之故致累其餘各城鎮安分良民均受停考數年之累是懲惡而不勸善矣如此辦法何以示公道而服人心自應商請諸國全權大臣將諸國人民被害被虐之處詳細開明城鎮地名不得統稱某府某縣俾於第二款原文相符以便本王大臣將停考各處請旨宣示相應照復貴領銜大臣希轉致諸國全權大臣查照辦理須至照復者

照錄日國葛大臣照會二月二十日到

爲照復事西歷本年四月初二日卽辛丑年二月十四日接准來文照復諸國全權大臣指請中國皇帝應允會定條款第二條末段應如何施行一事貴王大臣似以爲彼此業已允定之大綱於施行時有越分擴充之見復援引西歷本年正月十六日卽庚子年十一月二十六日所送貴王大臣註釋各條款說帖內之語本領銜大臣應特爲先行聲明說帖各節諸國全權大臣毫未容心轉留全然舉辦會定條款之力而行至來文剖辯一層今復行言明第二款末段所論諸國人民被戕害凌虐之各城鎮停攷一事貴王大臣於發端之原意統行誤會原意云何乃藉中國向來自用之罰以禁士人附和之習兼除推波助瀾之弊知

照貴王大臣所擬豈非有失原意乎何也蓋與士人以渡越諸國全權大臣所定懲限之機特其欺罔之術或謬論之詞以保應失之利是以諸國全權大臣核定務仍適其原因意照來文之言逐一細查應行停攷之城鎮恐致波及全省勢不能不較此尤爲更甚也須至照會者二月二十日

照錄給日國葛大臣照會三月十六日

爲照會事照得光緒二十七年三月十四日接准軍機處自西安來電內開頃據湘撫電稱和議大綱殺害各國人民各城鎮停攷五年查湖南衡陽清泉教案原係痞匪起衅並無士子干預似應免停且滋事僅該兩縣屬之黃沙灣港子口兩村鎮即使罰停亦祇應停滋事兩鎮等語因思停攷一條係專指上年拳匪肆擾地方而言他處偶有教案當不在此例如須停攷亦須說明祇停滋事兩鎮不得波及全縣以昭公允爲要等因准此本王大臣查停攷一事彼此公文往復迄未定議茲准軍機處來電特再詳晰言之查停攷五年自係停止滋事地方之人五年內不准應攷並非曾經滋事之地五年內不准開攷卽如北京一處上年旣肇變亂各國人民曾被戕害其籍隸本城之士子罰停五年攷試理固當然惟北京係中國都城不但各省舉人皆須來京會試卽順天鄉試亦合南北中三皿有各省貢監生在



內並不止順天一府生員若將會試與順天鄉試一概議停則併各省之人皆無從應試是以數城鎮人滋事之故而竟絕各省士子登進之階且滋事者皆不識字之莠民而令安分讀書之人同受其累何足以昭公允况各教士方欲與中國士大夫聯絡乃因停攷一事更與書生結怨似亦不甚相宜應請仍按應行停攷地方罰停該處應試之人其非寓居該城鎮者仍准照常赴攷不得統指一府一縣以示區別至停攷五年辦法自係專指上年拳匪肇亂地方而言他處不得援以爲例相應備文照會貴大臣希轉商諸國全權大臣查照見復以便將前次送來停攷地方清單奏請降旨宣示須至照會者

照錄日國葛大臣照會三月二十五日到

爲照復事西歷本年五月初四日卽中歷三月十六日接准來文以和議大綱第二條應停攷試五年之各城鎮將軍機處來電照會本領銜大臣轉致諸國全權大臣查照據貴王大臣所解以爲停考五年係停止滋事地方之人五年內不准應考非曾經滋事之地五年內不准開考云云其寔乃滋事之地五年內不准開考方爲真意若欲確知惟應查中國皇帝應允會定條款第二條二端文內載諸國人民被害戕害陵虐之城鎮五年內概不得舉行文武各等考試等語貴王大臣又進一解謂卽如北京一處停考卽與上年未經滋事之人

所有妨礙且滋事者皆不識字之莠民云云查貴王大臣此語乃深責已經認爲滋事之王大臣矣惟諸國大臣似疑滋事之人不得謂之不識字者然其舉止可以認爲莠民之行凡害各國人民之案向來均係讀書之人爲之倡率或從而相助去歲之亂尤屬不移中國人之罪不過受人指使而已今諸國全權大臣均係按照和議大綱第二條自應仍執原意相請可也須至照復者三月二十五日

照錄節略

和議總綱第二款第二端所載諸國人民被戕害陵虐之城鎮五年內概不得舉行文武各等考試自係指不准開考而言惟實有窒礙爲難之處譬如一府所屬共有十州縣內止一縣應停考因考棚在府城不准府城開考則九州縣之人皆不能應試未免屈抑今擬併此不論但商北京會試及順天鄉試山西鄉試三項因此乃最爲難者也茲按來單將能照辦與礙難照辦分別註明再請詳酌

山西省 太原府忻州太谷縣大同府汾州府孝義縣曲沃縣大甯縣河津縣岳陽縣朔平府文水縣壽陽縣平陽縣長子縣高平縣澤州府隰州蒲縣絳州平遙縣府城縣府安府洪洞縣歸化城綏遠城

河南省 南陽府河內縣鄭州光州陳州府濬縣內黃縣彰德府太康縣襄城縣西華縣

浙江省 衢州府

直隸省 保定府永清縣天津縣順德府望都縣獲鹿縣新安縣通州張家口朝陽縣東安縣滄州冀州遵化州武邑縣景州灤平縣河間府

山東省 泰安府臨清州

東三省 盛京甲子廠連山于慶街北林子呼蘭城

陝西省 甯羗州

江西省 鄱陽縣

湖南省 衡州府清泉縣

查中國考試由縣考爲始縣後有府考府考後有學院府縣府均係知縣知府在本縣本府地方考試學院府則每府有一考棚並不分臨各縣經學院取進後稱曰秀才逢鄉試之年各秀才齊赴本省省城應考經欽派主考官取中稱曰舉人逢會試之年各舉人齊到京城應考經欽派總裁官取中稱曰進士現擬照以上單開六十八處請旨飭令停考五年非但縣府學院均不考試亦並不准各該停考地方之秀才舉人於五年內赴鄉會試此現擬

按照來單辦理者也再以上六十八處內中似亦有情形未能訪確者如河間滄州並無戕害陵虐諸國人民之事據該府州具稟前來覆查相符似不應在停考之列如能除去尤昭公允以外州縣恐尙有似此者北京順天府太原府北京順天府並無考試秀才之事緣八旗及大興宛平兩縣之人考秀才均在通州既將通州停考則北京考試祇會試及順天鄉試而已會試係合十八省並東三省舉人考試向來俱在京城不能在外省開考而順天鄉試亦合十八省并東三省之人皆准應考非專考順天一府直隸一省之人因在京官員子弟必令回本省試甚多不便且東三省本省並無鄉試是以舊例如此合考若北京五年不開科則各省人均無登進之途士心必多不服北京應仍舊開考但不准停考地方之秀才舉人應試方爲妥洽秀才舉人禮部均有名冊可查固不能冒混也又太原府一處爲山西省城停止考試秀才已擬照辦惟山西亦有鄉試其非應停考之山西各府縣秀才籍練山西不能赴別省報考似應仍准鄉試以示體恤而昭勸懲此礙難按照來單辦理者也計照辦者六十八處欲再商酌者祇北京會試及順天山西鄉試而已望稍通融勿使爲難幸甚盼甚

照錄致日國葛大臣照會四月初二日

爲照會事光緒二十七年三月二十五日接准貴大臣照復以停考五年一事滋事之地五年內不准開考方爲真意諸國全權大臣按照和議大綱第二仍條執原意相請等因查各處滋事地方之人停考五年不准應試儘足示懲諸國全權大臣旣必須按定和議總綱第二款原文不准舉行字樣立說本王大臣擬將應行停考各處均卽按照來文清單辦理不再辯論惟內有實在爲難者如北京會試順天鄉試俱合考各省士子向來祇在都城若北京國不准開科則是因一二省有滋事之人而令二十餘省士子皆受停考之累是全停中國之考似不得爲公允又山西鄉試例在太原府城該省滋事地方合通省州縣計之其戕害陵虐他國人者不過居一省中四分之一若將太原府不准開考是將山西全省停止鄉試矣不鄉試則亦無從會試揆諸指地停考本旨似難符合諸國全權大臣之意當亦未必謂然是以北京會試順天山西兩省鄉試仍須照舊開考不在應停五年之列又查直隸河間滄州兩處並無戕害陵虐諸國人民之事西教士亦均知之並應免其停考昨經辦具節略未能遍送爲此備文照會貴領銜大臣請煩查照轉商諸國全權大臣迅速見復爲盼須至照會者

照錄日國葛大臣照會月四十五日到

爲照復事西歷本年五月十九日卽中歷四月初二日接准來文以停考五年一事閱悉之  
餘諸國全權大臣囑爲轉達查順天太原鄉試諸國大臣仍執前請一律停止至北京會試  
一節尙需詳細查核來文所稱滄州情形諸國全權大臣以爲足據允於清單內將該處之  
名刪除且將因無戕害陵虐諸國人民之事無需停考地方列單附送查照其河間府一層  
俟諸國全權大臣訪查之後再由本領銜大臣備文照復又前文所書之平陽縣實係平陽  
府之誤因西歷五月二十五日卽中歷四月初八日文牘論及特以奉復統希貴王大臣查  
照可也須至照會者平遙縣潞城縣潞安縣洪洞縣濬縣內黃縣彰德府太康縣襄城縣西  
華縣張家口朝陽縣東安縣滄州遵化州冀州泰安府臨清州清泉縣

清光緒朝中日交涉史料卷六四

(四六一二)慶親王奕劻大學士李鴻章來電

光緒二十七年五月初一日到  
電報檔

據日本小村使稱那侍郎充專使已得外部復電甚願接待等語祈早日請旨慶李豔

(四六一三)軍機處電寄那桐諭旨

光緒二十七年五月初一日  
電寄檔

奉旨戶部右侍郎那桐着賞給頭品頂戴授爲專使大臣前往大日本國敬謹將命欽此五月初一日

(四三二四)軍機處擬致奎俊電信

光緒二十七年五月初三日  
電寄檔

江電悉日本政府擬代訂教習一名入川課督武備學名如別無窒礙似可允行應如何訂議之處希尊處妥酌辦理樞江

(四六一五)慶親王奕劻大學士李鴻章來電

光緒二十七年五月初四日到  
電報檔

賠款事篠電發後次日德館參贊送來還款表查係自光緒二十八年起至三十一年止每

年專付利十八兆自三十二年至四十一年止每年付本利十八兆七十八萬七千五百兩  
自四十二年至五十七年每年付本利銀二十一兆四十五萬七千五百兩自五十八年至  
七十一年止每年付本利銀三十三兆七十四萬二千五百兩計四十四年共還本利一千  
零七十五兆五十九萬兩其數係逐漸加增而最重在後十四年再四籌思賠款一定年期  
必須按年照付絲毫不容短少論目前財力總以少定賠數爲是初意本欲騰挪年限以期  
少出利銀乃分五十年先付本後還利之辦法各使皆不謂然嗣續擬每年付本利二十兆  
四十五萬餘兩四十年清還及每年付二十一兆五十年清還計本息總算俱不及九萬萬  
各使俱不肯允轉念不如照英薩使所言每年付本利二十六兆零三十年清款共本利約  
七萬八千萬有零總計所省息銀甚多惟以二十六兆較十八兆每年須多付銀八百萬當  
此財源匱竭仰屋興嗟何從籌此鉅款薩使初雖曾作是語及後又以中國抵款爲難還萌  
悔念於是商立此表前四年專收利息卽傑遜在江甯所稱爲中國每年籌減六七百萬之  
說也或謂前四年專收利且自第五年至第十四年拔本太少在我吃虧息銀太多各使則  
謂起初數少於中國最爲相宜如中國每年所籌實不能逾十八兆則可免籌款爲難如能  
每年多籌數兆旣不須付出儘可另存生息亦備日後付款加多時之用並無吃虧前借英



德債十年後方始拔本又稱海關稅抵舊債最多時至每年二千四百萬加新款利銀乙千八百萬共合四十二兆此表所列新款應付之數後十四年每三十三兆爲數似多然屆時舊債大減以所餘之數撥付新款合計每年仍不逾四十二兆並未令中國爲難所言似尙近理竊謂與其貪早完之省利而力有不及或以失信召侮何如稍寬年限使財力得舒日後中國能有轉機每年多籌數百萬金當非難事以目下情形而論添籌新款實無把握釐金作批各國尙多不願赫德稱此表有三善一抵款不須多籌可免動釐金二可免各國藉詞干預三由海關撥補係中國實能拏出之款日本小村使稱各國政府訓條尙未到齊可否於下次會議時分還年限卽照送來款表定議請酌核示復抵款俟商定再開乞先代奏奕劻李鴻章江

(四六一六)軍機處電寄奕劻李鴻章諭旨一

光緒二十七年五月初五日  
電寄檔

奉旨現距撤兵限期僅有十日究竟各國兵隊果如期全撤否覲見禮節如何定議迄未據奏教案續行議處人員亦未據商定復奏當不至因此宕延又生枝節該王大臣膺此重任責有攸歸著卽迅速電復其通商行船約章亦須及時妥議前有旨令盛宣懷會同商辦是

否應在京會議抑在滬邀集洋商先行妥議並著妥籌電奏仍知照盛宣懷遵照又民教專約關係甚重亟應趁此與各國會商定立妥協章程奏明通飭遵照以杜後患而固邦交欽此五月初五日

(四六一七)軍機處電寄奕劻李鴻章諭旨二

光緒二十七年五月初五日  
電寄檔

奉旨奕劻李鴻章江電悉賠款一事每年二千六百萬中國既難籌抵足數則各國列表年限展寬十四年利息多至二萬數千萬勢亦不得不然該王大臣俟各國議覆到齊再與婉商如實不能磨減只可照準至海關如何撥補如何指項作抵於中國利權有無窒礙並著妥確籌商電奏欽此五月初五日

(四六一八)江蘇巡撫松壽來電

光緒二十七年五月初六日到  
電報檔

恭查元日電旨本年舉行鄉試飭體察情形有無窒礙迅卽電奏等因欽此經前撫覆奏可  
以舉行自應遵辦無如近來時事與前不同體察情形頗有窒礙不得不陳請展緩遵查豫  
省毗連直境上年兵後時有會匪潛來煽惑愚民民心浮動從前未結教案現雖催辦亦難

尅期了結近來民間聞豫中數州縣爲洋人請停考試士心積不能平若議開科則士子商販等聚於一城省城通衢時有洋人往來省會商辦案件而豫俗強悍風氣未開每逢鄉試之年士子等往往恃衆生事况挾停考之忿萬一與洋人偶有齟齬恐致牽動大局當此和議初定萬不可別生枝節辰下回鑾定於七月十九日計壽赴接駕之際正秋闈將考之時不特辦差之文武各官均須出省省內外各營亦須調赴沿途護衛行宮省城空虛士商雲集良莠雜處保無奸徒乘虛混入防範難周均不能不先行慮及者也擬請將本年鄉試展至明年秋後舉行以杜隱患伏乞代奏請旨壽支

(四六一九)湖廣總督張之洞來電

光緒二十七年五月初六日到  
電報檔

全權議賠款分四十四年共一千零七十五兆前十四年數雖少第十五年起至第三十年每年二十一兆四十五萬零數已不少第三十一年至四十四年每年三十三兆七十四萬零爲數太多其故由前四年全不還本次十年還本太少故受此虧竊思籌款固難然能籌一千八百七十餘萬何在二三百萬乎總之每年及早帶還本銀若干方爲合算此時洋兵已漸撤議賠款之年限並不甚急務請暫勿復允但俟其將抵款商定電聞看其擬令何款

作抵方可籌酌此數日內容江鄂詳加核算有何稍爲較減之法奏聞再請鈞處統籌核定全權見表後待八日始電奏可見遲早不爭數日望勿急遽至禱祈代奏之洞肅歌

(四六二〇)軍機處擬致奕劻李鴻章電信

光緒二十七年五月初六日  
電寄檔

賠款一事昨日已有電旨今有人奏原議有每年籌還二千萬尙可敷抵之說所定展寬年限前四年全不還本次十年還本太少以致利息多出二萬數千萬受虧實甚聞江鄂現正籌商減輕辦法刻下各國議覆未齊請尊處先將抵款一層與之商定擬將何款作抵迅即電奏現已電催江鄂兩督迅籌電復再行轉達以便通盤核計婉與磋商冀臻輕減樞魚五月初六日

(四六二一)軍機處擬致張之洞電信

光緒二十七年五月初六日  
電寄檔

歌電悉昨全權電奏賠款亦知吃虧甚鉅惟因撤兵限期甚迫恐或延誤當奉電旨再與婉商如實不能磨滅只好照准來電所云各節具見蓋籌周密頃已電致全權將抵款一層先與商酌電奏請旨其原擬分還年限數目暫緩定議惟各國議覆尙未到齊恐意見尙難一

律總以不致因此宕延撤兵爲要應請尊處將所籌如何較減之法迅商江督速爲核擬電覆以便請旨轉電全權定議樞魚

(四六二二)慶親王奕劻大學士李鴻章來電

光緒二十七年五月初七日到  
電報檔

歌電旨謹悉五月十六日乃截止賠款日期並非限定洋兵於是日撤盡各國軍隊自德瓦帥出京後已陸續減撤但人數太衆運船不敷驟難退完大約六月間可全數撤去似不至再生技節覲見事各使請准乘黃轎在乾清宮階前降輿禮制太覺不符屢次磋商未能定議教案續行議處之員與商未覆致各使亦屢次會議意見尙未全同但英薩使接到原擬斬候各員重降諭旨及停試奉旨照會並未再言不肯撤兵惟聞各使中仍有不願北京會試者請借河南考棚薩使於此節未能踐言殊出意外然於撤兵似無妨礙至通商行船條約和議總綱第十一款載明各國以修改爲有益者中國認與商議更改是此次改約各國專爲取益起見斷不肯乘此事變給我便宜彼肯緩商於事較妥在我似不須亟催盛宣懷在滬與洋商恐無可商辦此等事公使及政府主持商民只能參贊至民教更訂章程已飭周馥相機商訂值此教士氣燄方張各使極力庇護不特難期就範且慮藉勢要挾侵我政

權無益有害試思此次殺戮教士教民過多而我轉欲設法箝制理勢俱絀能否訂定所不敢知請代奏奕劻李鴻章初七

(四六二二)會辦商務大臣盛宣懷來電

光緒二十七年五月初七日  
電報檔

全權江奏還款先輕後重辦法核之海關舊債表光緒四十二年至五十七年每年還一千玖百餘萬五十八年還一千三百萬五十九年至六十八年還六百餘萬六十九年還一百餘萬即完設新舊通籌正可勻稱經與各使叫破歲入僅八千餘萬至多以一半還債赫德計乃出此然非內外併力開節已不易支至通商行船約章第十一款載明各國以修改爲有益者中國認與議改大約除加稅外恐於中國損多益少且各國意見百出非一時所能商議似宜將此條歸入善後俟約成兵退從容會籌可少吃虧似此各財政不致干預惟礦務彼覬覦最甚若不選擇各國合式律例亟謀以開爲守和約定後勢必羣起爭佔利權盡失且恐從礦而佔路且從礦路而佔地所關甚鉅但事涉各省輾轉會商勢必因循泄沓可否請飭政務處早籌抵制以免延誤乞代奏宣懷謹肅魚

(四六二一四)軍機處擬致盛宣懷電信

光緒二十七年五月初七日  
電寄檔

魚電悉礦務一節所關甚鉅誠如尊論亟宜以開爲守各國合式律例希即擇要見示其應如何抵制之處亦望熟籌電知以便核議請旨辦理樞陽

(四六二一五)慶親王奕劻大學士李鴻章來電

光緒二十七年五月初九日到  
電報檔

那桐出使日本應有國書該國向例索觀敕諭茲謹擬就國書敕諭照錄於下國書文曰大清國大皇帝敬致書於大日本大皇帝陛下朕維中國與貴國同在亞洲海程密邇彼此遣使駐紮以來誠信相孚情誼彌摯乃上年五月京師猝遭拳匪之亂兵民交訐貴國使館書記生杉山彬竟至被戕殞命該書記生隨使來華應獲保護之益不意變生倉猝遽爾捐軀朕自維薄德未能先事預防致令友邦官員慘遭不測有傷睦誼彌切疚心業派大臣致祭並頒發內帑以示優卹茲派頭品頂戴戶部右侍郎那桐爲欽差專使大臣親齎國書前往貴國呈遞該大臣忠誠素著朕所深信特令敬謹將事表明惋惜之懷藉達優榮之典此次大皇帝遣師遠涉到京之日首先安民又於和議要端盡力維持特伸公論東方大局賴以保全義問仁聲昭布遐邇朕心尤爲欣感并令該大臣代達謝忱惟望大皇帝盡棄前嫌益

敦夙奸唇齒輔車之誼歷久彌親從此海宇乂安升平同享惟大皇帝鑒察焉敕諭文曰皇帝敕諭頭品頂戴戶部右侍郎那桐朕維交鄰之道詳於古經遣使之文著爲令典矧在同洲之國尤切輔車之依茲因大日本國書記生杉山彬在京被戕朕心惋惜宜示優榮特授爾爲專使大臣親齎國書前往呈遞務宜殫竭忠誠敬謹將事於一切交際儀文悉心經理勉副皇華之選益聯與國之歡爾其欽承朕命無負委任特諭請代表奕劻李鴻章

(四六二六)南洋大臣劉坤一湖廣總督張之洞來電

光緒二十七年五月初十日  
電報檔

賠款事薩使每年二十六兆之說全權旣以多籌八兆爲難竊擬有酌中籌還一法目前每年約祇多籌四兆共分三十六年還前十四年每年還二千二百萬第十五年至三十五年每年還二千六百萬第三十六年還一千一百九十六萬四千一百三十兩總數共八萬六千五百九十六萬四千一百三十兩核算無異較全權議還完早八年半除前二十九年復還本銀之數抵除外所省約二萬一千萬查前二十九年雖較全權所議略增然前十四年僅多或四百萬或二百二十一萬後十五年雖多四百五十四萬零而舊債表爲數漸輕海關已盈餘一百二十七萬零實仍只籌三百二十六萬零第三十年至三十五年則每年少



還七百七十四萬零第三十六年則少還二千一百萬矣第三十七年至第四十四年既已還清則每年省三千三百萬矣竊思每年至少需還十八兆亦必須中外合力另籌大宗巨款方能應付即多籌三四兆似尚有策而總數所省實多免致三十年後忽增巨累嘗考法爲德破賠款極鉅其關臣民同心努力趨先籌措於未滿年限之先卽行清還各國驚異謂其志氣堅壯不數年法國復強蓋謀國之道當計久遠微弱時尤甚若目前不避艱難早圖自振是爲生機若苟圖一時輕省不計久長是爲敗氣強弱進退之消息實在於此至撤兵一節久經各使言明利息議定卽允撤兵斷不至因籌商年限另思變計卽使全權所議已告各國而此次所擬辦法乃係提前還本當必更願坤洞等非與全權立異同特爲國家億萬計不敢不言仰懇聖明裁奪請代奏坤一之洞青

(四六二七)南洋大臣劉坤一來電

光緒二十七年五月初十日  
電報稿

近與各國交涉事益繁冗使臣一差關係更重中日同洲誼聯唇齒東三省一事尤賴日本相助公論現在駐日使臣李盛鐸已報三年期滿該國駐滬總領事前來江寧述及外部之意謂接替之員必須遇事和衷於兩國方爲有益如前江蘇蘇松太道蔡鈞才具明幹熟諳

洋情尤爲該國外部所信服若代李使足以聯絡邦交謹以密陳可否簡用之處伏候聖裁  
乞代奏坤一佳

(四六二八)軍機處擬致奕劻李鴻章電信

光緒二十七年五月初十日  
電寄檔

賠款事現據江鄂兩督電奏擬有酌中籌還一法目前每年約只多四兆共分三十六年還  
前十四年每年還二千二百萬第十五年至三十五年每年還二千六百萬第三十六年還  
一千一百九十六萬四千一百三十兩總數共八萬六千五百九十六萬四千一百三十兩  
較原議還完早八年半除前二十九年多還本銀之數抵除外所省約二萬一千萬查前二  
十九年雖較所議略增然前十四年僅多或四百萬或三百二十一萬後十五年雖多四百  
五十四萬零而舊債表爲數漸輕海關已盈餘一百二十七萬零實仍只籌三百二十六萬  
零第三十年至三十五年則每年少還七百七十四萬零第三十六年則少還二千一百萬  
矣第三十七年至四十四年既已還請則每年省三千三百萬竊思每年最少需還十八兆  
亦必須中外合力另籌大宗巨款方能應付即多籌三四兆似當有策而總數所省實多免  
至三十年後忽增巨累嘗考法爲德破賠款極巨其國臣民同心努力趕先籌措於未滿年

限之先卽行清還各國驚異謂其志氣堅壯不數年法國復強謀國之道當計久遠微弱時尤甚若不避艱難早圖自振是爲生機若苟圖一時輕省不計久長是爲敗氣薄弱進退之銷息實在於此卽使全權所議已告各國此次所擬辦法乃係提前還本當必更願坤洞等非與全權立異同特爲國家億萬年計不敢不言等語此次償款前電分四十四年新舊併還雖總數吃虧而每年抵款較易自係不得已辦法今議早還八年總數實少二萬一千餘萬尙屬合算現在以鹽漕常稅指抵已有二千五十萬再加洋稅除抵舊債外尙有盈餘可以備抵自屬可行不知各國議覆到齊否應請再與商定電覆請旨樞蒸

(四六二九)慶親王奕劻等奏收回總署情形摺 光緒二十七月二十八日

臣奕劻等跪奏爲謹將收回衙署及一切情形恭摺具陳仰祈聖鑒事竊臣等所管總理衙門自上年洋兵入城後卽有日本兵前來佔住並將看守衙署之官役人等全行逐出旋又換俄兵看守迨至閏八月間俄國聲稱訂期交還衙署惟大堂暨東西文案處清檔房存有檔案均經各國會同用蠟印封固須俟各國會同前來始能拆封等語當經派員前往接收詎知俄國甫經交還德兵復又佔去嗣經臣等會同大學士臣李鴻章屢次照會各國使臣

令其早日交還衙署檔案以便辦公茲據德國使臣穆默函稱訂於本年三月十三日交還衙署並一切檔案仍借用署內之同文館房屋爲德兵居住等因當派總辦章京等帶同繙譯官屆期前往會同各國使臣所派之員將衙署交付並當面將大堂暨東西文案處清檔房所有蠟印均行拆封接收訖卽經查點所存公牘檔案損失尙不甚多其餘各處房屋所存公事約章冊檔以及礦務鐵路總局檔案並西堂收存密件暨棹欖陳設門窗戶壁一概全無銀庫所存款項除上年奏明撥交神機營虎神營各十萬兩外尙餘銀十八萬餘兩又礦路局餘存銀兩亦均蕩然無存接收之後百廢待舉臣等卽派總辦章京督飭匠役擇要修理並購置棹欖等項粗爲置備於四月初六日移回署中照常辦公除俟同文館交還再行具奏外理合陳明伏乞皇太后皇上聖鑒謹奏光緒二十七年五月十二日奉硃批知道了欽此臣奕劻臣王文韶臣崇禮臣桂春臣那桐臣宗室博興

(四六三〇) 榮慶等奏查覈日本交回之清河兩倉情形片

光緒二十七月四月二十九日

再京中各倉全被洋兵佔踞嗣經日本向慶親王奕劻言明將清河兩倉交回當經臣等添

派監督徐宗蔭書通協同本裕豐益兩倉監督將所存米石確實查覈據稱本裕倉除日本動用外實存粳米九千四百石粟米一百三十石豐益倉除日本動用外實存粳米一萬四百六十石零秈米三百三十石零粟米五百二十石零經慶親王奕劻直隸總督李鴻章商明以本裕一倉全數平糶京內貧民留豐益一倉支放外三營兵米當由督臣李鴻章派員前赴本裕倉將前項粳粟米石儘數承領並將粳底販米五百六十石零粟米六十九石續行埽數領訖其豐益倉米石正飭各營造冊承領間又經義國兵官佔踞復經慶親王奕劻致函申說再派繙譯郭家驥與臣等所派監督徐宗蔭書通等連日往見洋官疊經周折多方解說始經義官允以所存米石以一半自行賑濟附近貧民以一半運出放給外三營及精捷營各兵丁並開軍人等現於四月初十日起十九日止共運出米五千四百九十二石陸續由圓明園健銳火器精捷等營營總翼長親身承領覈實散給各該營兵丁以蘇兵困而廣皇仁再祿米一倉前被俄兵佔踞退出先經尙書敬信與之說明放給中書筆帖式等官每員兩石其餘米石經俄官自行賑濟貧民現已顆粒無存此清河兩倉並祿米倉現在情形也其餘各倉統俟交還後再行確切查明據實彙報謹此附片具陳伏乞聖鑒謹奏光緒二十七年五月十二日奉硃批戶部知道欽此

(四六三二)慶親王奕劻大學士李鴻章來電

光緒二十七年五月十三日到  
電報檔

蒸電悉江鄂所擬三十六年清還賠款辦法總算省息良多惟最難在抵款德使等所擬之表好在除一千八百萬外以後遞加銀數即用海關每年歸還舊債所餘儘數付給無庸另行指款作抵於我甚便如江鄂所擬前十四年每年多還四百萬第十五年至卅五年每年多還四百五十四萬二千五百兩此項較德表多還之數不知應指何項抵款雖稱每年祇多四兆有策可籌即使我真能籌彼未必肯信且各國均謂抵款必須有洋人經手方能放心故鹽課釐常稅皆請歸稅務司稽查即就一千八百萬詳籌已頗艱於設法是以俄德美日本使有願將海關稅由我收足值百抽五不算加稅及煙酒免稅等貨可允徵稅之議冀連鹽款常稅湊足十八兆至貨厘漕折土藥稅各使不允作抵難與再商果能上下官民內外一心如法人之還德款夫復何言惟中國局勢太散民生太苦劉張皆獨當一面洞悉時艱試問能如法人所爲否今不論日後籌款之難易且先計目前抵款之有無乞電詢江鄂將所擬二十四年中每年多還四兆擬指何項的款作抵速行電覆以便商議再各國訓條聞已到齊皆稱德表可用並聞慶李文

(四六三二)南洋大臣劉坤一湖廣總督張之洞來電

光緒二十七年五月十四日到  
電報檔

昨江鄂會奏賠款酌中辦法恐全權以每年多還數兆即須多指抵款不能商議竊思此次賠款假令各國並不索利止照原數分年攤還自應照每年攤還之數指足抵款作保今既取息四厘是中國若照全數四百五十兆每年還利息十八兆便不虧負各國其還本若干乃隨我之便量力辦法觀德外部之言可證然則斷不能少還者十八兆是抵款亦止應指足十八兆而已此外每年還本乃我格外努力豈有反因此多勒抵款之理全權似可據與各使辯論免其多指抵款藉詞干預查呂使漾電德外部云至少須四厘每年出利十八兆中國不致爲難等語其意似亦謂中國能保十八兆之利便可再此次議定年還若干應聲明將來中國候能多籌除議定應還之數外隨時任便提前歸還利隨本減等語如此時預先議明將來設或能隨時多還則以後利息所省不少昨電未詳謹續達祈酌裁望無言出江鄂意尤感坤一之洞同叩佳

(四六三三)軍機處擬致奕劻李鴻章電信

光緒二十七年五月十四日  
電寄檔

文電悉昨又據江鄂兩督電稱各國賠款議取息四厘每年還利息十八兆指抵的款便不

虧負其還本若干乃隨我之便量力辦法豈有反因此多勒抵款之理似可據與各使辯論查呂使漾電德外部云至少須四厘每年出利十八兆中國不致爲難其意似亦只令中國指抵十八兆之利若能每年多四兆之本未必不願且此次議定年還若干亦應預爲聲明將來中國若能多籌除議定應還之數外隨時任便提前歸還利隨本減以後所省不少等語前電所商每年多還數兆係於息外還本乃我格外努力似不至多勒抵款無防與各使婉商卽提前歸還利隨本減一節無論以後能否籌出似亦可預行聲明以爲將來地步設能隨時多還則所省利息實巨諸賴大才從長籌畫妥爲定議也樞鹽五月十四日

(四六三二四)慶親王奕劻大學士李鴻章來電

光緒二十七年五月十七日到  
電報檔

鹽電悉江鄂電謂十八兆以外乃量力還本辦法無勒我抵款之理此按尋常借債言也借債本爲圖利但能利息不欠歸本多少便可不拘此次賠款與借債不同各使每言所用之銀已由各本國設法借墊中國每年能付若干彼卽作爲歲入之款以備支用如允付而屆時拖欠恐致誤彼要需是以前經議明付給若干不論是本是利皆須指明抵款英德等使每以中國多付恐無的款可抵爲言尙非無理卽前借英德商債每年歸銀五百萬亦尙以



鹽貨釐七卡抵足可知洋人之本利並重矣至將來中國若能多籌除議定應還之數外隨時任便提前歸還利隨本減自可豫先議訂以爲後圖慶李咸

(四六三五)南洋大臣劉坤一來電

光緒二十七年五月十八日到  
電報檔

駐滬日本領事電風聞俄索喀什噶爾是否確實祈示等語究竟有無此事再上月皓電請飭全權照會領袖公使詢商俄兵在東三省者何時撤回事關重要會否奉有諭旨祈電復坤洽

(四六三六)南洋大臣劉坤一湖廣總督張之洞來電

光緒二十七年五月十八日到  
電報檔

閱全權電奏稿各使欲乘黃轎在乾清宮前降輿實堪駭異公使雖待以客卿究是人臣若國君游歷來華又將何以待之且各使與各國太子親王禮節亦有等差卽黃轎亦不應乘坐各使不顧中國儀注獨不爲本國留體制乎此節無論如何萬不可許竊思各使駢盈逼索不過欲洩其攻館之忿查外國之待公使遇有典禮則國君必遣其自坐之車前往迎

迓此各使所以藉口也然各國君向無黃轎故其國臣民不以爲異行之中國實駭物聽恐因此忽生事端此時似宜籌一抵制之法或令上駟院備良馬數匹卽稱爲御用之馬遇各使有大典禮覲見之時卽用此項馬匹前往迎迓平日則否抑或別予優異以阻其黃轎詣宮爲斷懇飭全權設法婉商以存國體再告各國使館留兵之數亦請飭全權查明據實奏聞請代奏坤一之洞咸

(四六三七)軍機處擬致奕劻李鴻章電信一

光緒二十七年五月十八日  
電寄檔

頃據江鄂兩督電各使欲乘黃轎在乾清宮前降輿實堪駭異公使究係人臣應待以客卿之禮設國君游歷來華又將何以待之况各國太子親王亦有等差亦不能乘黃轎不爲中國禮節計獨不爲本國留體制乎務須婉切商辦或別予以優異之處等語前接來電此節尙未議定究竟磋商如何查各國有以君主之車迎迓公使者係專指齎有國書而言是敬君非敬使也公使覲見尋常亦從未聞有乘君主車者設各國公使同時覲見焉有許多黃轎似可據理力爭卽各國體制亦不應有此至降輿之處亦以在乾清門外簷下爲宜已足以示優異總望大力切實商辦妥定爲要樞嘯

(四六三二八)軍機處擬致奕劻李鴻章電信二

光緒二十七年五月十八日  
電寄檔

頃江督電稱此次與各國議和本有俄之東三省賠項在內為數又最多現在德兵先撤各國亦陸續皆撤則東三省俄隊亦應撤退庶合情理應請電飭全權照會領袖公使詢商俄兵在東省者何時撤回一面由全權電致三將軍預籌接收辦法以免延誤且看俄使如何答覆再行籌度辦理又聞風俄有索喀什葛爾之信並應查探確否等語希即妥酌辦理並喀什葛爾之說有無其事電示為盼樞嘯

(四六三二九)軍機處電寄蔡鈞諭旨

光緒二十七年五月十九日  
電寄檔

奉旨前江蘇蘇松太道蔡鈞著以四品京堂候補充出使日本國大臣俟李盛鐸報滿後即行前往接替欽此五月十九日

(四六四〇)慶親王奕劻大學士李鴻章來電一

光緒二十七年五月二十日到  
電報檔

據日本小村使函稱外務電開醇親王使德回路經美暨日本政府因望旌節抵日迎駕入

京藉伸同洲和好之誼請奏明爲要等語該使所稱具見和好邦交之意自應照准藉伸聯絡祈代奏請旨遵行又聞英比亦有此意可否俟函到卽行知照醇親王援照辦理奕李效

(四六四一)慶親王奕劻大學士李鴻章來電二

光緒二十七年五月二十日到  
電報檔

嘯電悉覲見禮節前據各使照會堅請准坐黃轎及在乾清宮階前下轎當經備文駁覆謂與中國體制太不相符礙難奏請駁令仍坐綠轎至東華門換椅轎至景運門並經迭派員商論各使仍復堅據謂中國到外國常以國主自乘馬車迎接入宮今只請用黃轎不爲過分又謂上轎路遠雨淋日曬甚爲不便多方辨論未能就範旋又派負商議告以日後各國如有太子及頭等親王來華更何以加必須預留地步擬准通融轎用黃繮至景運門下轎美日本兩使允將商各使卽經備文照會昨據照復綠轎黃繮可允至仍請在乾清門降輿本擬再與爭辯仍令在景運門下轎明知彼必不允但以事關朝廷體制未敢輕易通融茲來電旣云可許乾清門外檐下降輿實足以示優異擬卽照復允准奏結指日回鑾各國必請覲見此次宜早定議爲妥鴻章前遊歐美各國宮殿雖極崇隆皆由小門出入外臣皆直抵門前降輿中朝規制闕闕故以爲不便有一國使宣稱若將鸞儀殿已燬基址改建洋房

一切照西式辦理專爲接見外臣各使必無爭論所言亦甚有見姑備一說候采擇慶李號

(四六四二)軍機處電寄奕劻李鴻章諭旨

光緒二十七年五月二十日  
電寄檔

奉旨奕劻李鴻章效電悉日使函稱醇親王使德回路經美暨日本政府望旌節抵日藉伸同洲和好之誼等語著照所請以重幫交英比如有此意函請亦可準行卽由該王大臣隨時知照辦理仍一面電聞欽此五月二十日

(四六四三)慶親王奕劻大學士李鴻章來電

光緒二十七年五月二十一日到  
電報檔

嘯電悉東三省俄隊設專約早畫押易商撤減江鄂督爲日本所愚力阻畫押今忽爲商撤俄隊之說甚非情理自停畫後俄使除公會外絕無往來何從與商卽商必置不理不料力阻畫押者爲此謬論也至索喀什噶爾之信未知從何得來此間毫無影響慶李哥

(四六四四)軍機處擬致劉坤一張之洞電信

光緒二十七年五月二十一日  
電寄檔

全權電覆東三省俄隊設專約早畫押易商撤減江鄂督爲日本所愚力阻畫押今忽爲商

撤俄隊之說甚非情理自停畫後俄使除公會外無往來何從與商卽商必置不理至索略什噶爾之信從何得來此間毫無影響等語電聞樞箇

(四六四五)山東道監察御史吳煦請變通賠款以保殘黎摺

光緒二十七年五月十一日  
光緒二十七年五月二十三日

山東道監察御史臣吳煦跪奏爲民力困竭籲懇變通賠款以保殘黎而息亂萌恭摺仰祈聖鑒事竊維圖治之本首重植民民不聊生則新政何以興變局何以安况畿輔之間關係尤重自團匪肇亂聯軍攻擊焚燬殺掠不可勝紀實則拳匪頭目非被誅戮卽已遠竄今之偷息田野者皆良懦也家破財盡日夜飲泣荼毒之苦所不忍言始困於團匪之迫脅再困於潰兵之殺掠三困於土匪之搶劫四困於聯軍之供億五困於吏役之借端苛派惇惇遺黎無所控告惟泣望鑾輿迴軫重瞻天日頃和局告成賠款略定聞直隸各州縣賠卹各款均責諸民間攤還夫使果爲拳匪而責其罄家以免死亦何不可卽或按戶攤賠而民力能支猶可言也今則脂膏已盡胔削及骨論者但知拳匪之當嚴懲而不知良民之不可概視爲拳匪也知財用不足借重民力而不知良民迭經搜括已無餘資不得不量爲變通也各

州縣賠款不一其輕者及稍重者或民間與教士議定完案或州縣與教士議定集款賠繳惟賠款最鉅之處動需百萬以外洋兵往返多次民力實已告罄萬離再籌鉅款可否仰懇天恩飭下督臣酌量籌款撥補賠項最重之府縣以恤民艱臣非不知度支奇絀賠款驟增何忍再以民間攤款重貽君父之憂惟輕重緩急尤宜熟權畿輔當殘破之餘正供以外驟加鉅款奸胥猾吏從而威逼臣恐傾家戕命不足取盈強壯流爲馬賊老弱盡轉溝壑平民入教以免苛派爲害滋大且臣聞通州等處屢以勒賠抗官宣化府賠項一百四十餘萬爲數尤鉅緩之則聯軍旣退無以應命急之則挺而走險民與官仇萬一猝不及防再出教案卽痛加勦洗而事中生事軍務又興賠款又添恐耗費者尙不止此數與其強勒窮黎而於事無濟何如另籌鉅款以拯窮民而弭隱患之爲愈也臣目擊情形不忍緘默愚昧之見是

否有當伏乞皇太后皇上聖鑒訓示謹奏光緒二十七年五月十一日

(四六四六)南洋大臣劉坤一來電

光緒二十七年五月二十五日到  
電報檔

簡電悉查改約中第四條滿洲兵數及駐兵地方仍須與俄商定第五條將軍辦事不合邦交經俄聲訢卽須調離第八條東三省路礦等項利益非先與俄商明不允讓與他國人則

是事事聽命於俄我自主之權盡失矣至第十二條俄自幹路或枝路造一路至直隸滿洲  
交界處之長城爲止其計甚毒其事尤危此約若行則東三省地還猶未還俄隊退猶不退  
各國聞有此約莫不譁然競思效尤一經畫押卽啓瓜分之漸不僅失東三省也江鄂所以  
堅持各疆吏各駐使皆以爲然者誠不忍坐視祖宗發祥之地淪爲異域全國權利爲各國  
分佔非故與全權爲難也日本深慮唇亡齒寒不得不與我合力中俄強弱不敵亦不能不  
引日本爲援全權始終爲俄所愚而謂江鄂爲日本所愚乎此事以俄約是否有礙主權不  
至效尤爲斷若有此二害則力阻畫約未爲失計全權於江鄂似有意見時艱至此雖戮力  
効忠尤慮不能補救何可自相水火置國事於不顧此次賠款惟俄獨多聲明東三省鐵路  
等費在內旣在公約內同索賠款自應與聯軍一同撤兵且係請照會領袖公使並非專商  
俄使本係正辦未爲謬論商而不允再作計議先不肯商其謂之何擬請仍電全權照會領  
袖勿再偏執至禱坤養

光緒二十七年五月十五日  
鑾儀衛掌衛事大臣和碩慶親王臣奕劻等謹奏爲查明臣衛實在情形恭摺奏聞仰祈聖

光緒二十七年五月十五日

鑾儀衛掌衛事大臣和碩慶親王臣奕劻等謹奏爲查明臣衛實在情形恭摺奏聞仰祈聖



鑒事竊自上年七月京師猝遭兵焚臣衛及鑾駕外庫均被洋兵踞當將值班護印官員校尉等全行逐出駐紮數月現今和局已定臣衛交還臣等督率章京詳細查看其大庫所存堂印一顆行在堂印一顆七所司廳印信二十二顆全行遺失檔案文卷冊檔均被殘燬無存現在應行文件謹擬借用鑲黃旗滿洲都統印信俾昭信守俟奏聞後應行文禮部另行鑄造頒給以符定制查內庫收存鑾駕等件均未遺失惟銀庫失去銀一萬零六百餘兩覆查外庫前爲洋兵駐紮之所今又在劃界之內所存鑾駕車轎輦乘各件盡皆遺失謹將內庫所存外庫所失各件另繕清單恭呈御覽所有查明臣衛實在情形並應行禮部鑄造堂司印信緣由謹恭摺奏聞伏乞皇太后皇上聖鑒謹奏光緒二十七年五月二十八日奉硃批知道了欽此掌衛事大臣和碩慶親王臣奕劻滿鑾儀使臣明安臣伊立布赴（行在）

（四六四八）軍機處電寄許台身諭旨

光緒二十七年六月初二日  
電寄檄

奉旨雲南候補知府許台身著以道員用並賞加四品卿銜充出使韓國大臣欽此六月初

二日

(四六四九)軍機處電寄奕劻李鴻章諭旨

光緒二十七年六月初六日  
電寄檔

奉旨現已屆六月各國之兵究竟何時撤盡京使館留兵若干天津及洋卡各留兵若干著奕劻李鴻章查明電奏欽此六月初六日

(四六五〇)軍機處電寄奕劻李鴻章諭旨

光緒二十七年六月初七日  
電寄檔

奉旨諭奕劻李鴻章現在和議已定公約何日畫押著即電聞以慰廬系欽此六月初七日

(四六五一)慶親王奕劻大學士李鴻章來電

光緒二十七年六月十一日到  
電報檔

虞電旨謹悉和議總綱十二款即算公約總綱定後不過照綱內所載逐款議辦用照會商定無須畫押計現在尙未辦結最要者祇賠款禍從二端賠款攤還年數銀數大致已可就緒據德穆使稱俟與各使商允再行會商定議各省禍從因減商員數太多英薩使復有意挑剔以致遲滯聞賠款內抵款各使中有願以海關收足值百抽五並免稅之貨征稅每年可得銀二百萬作抵者英使以該國商務最大尙不甚愜意然此等皆無礙和局緣十一國使意見每有參差未能尅期立定也現京城地面各國已陸續交收俟法兵官巴堯從五台

山回時據云京西一帶法兵亦可全撤請代奏以紓宸廬奕劻李鴻章佳

(四六五二)慶親王奕劻大學士李鴻章來電

光緒二十七年六月十二日到  
電報檔

語電旨謹悉京城地面各國已陸續交出俄美兵除留護使館外餘早撤淨英德日本亦撤過半保定僅有法兵未撤聞各國現存在京兵隊望後可再撤三分之一俟西安啓蹕再撤二分之一俟由河南回鑾卽全數撤退彼等撤兵向不知照撤去若干卽問亦不以實告總稱看運船多寡陸續撤去其各使館留兵現無確數聞統計約在二千內外天津及沿途洋卡亦無確數聞天津約留六千或八千沿途洋卡每卡約三百共計不逾二千屢經訪詢均稱回鑾早則撤兵速遲則更多觀望請代奏奕劻李鴻章蒸

(四六五三)湖廣總督張之洞來電

光緒二十七年六月十二日到  
電報檔

箇電悉俄約責我以東三省吏治而盡將兵權利權政權奪去專令我壓制華民以供俄人之役使而已利則歸俄害則屬我名爲俄還東三省於我之約實則我讓東三省於俄之約也從前疊次電奏屢經痛切瀝陳此約若成不獨失關東各國必將效尤瓜分內地各省亦

不能安全其俄鐵路到京駐兵護之則法亦必以護路爲名駐兵直抵京外他國皆沿鐵路駐兵豈止各省不安京師亦不能安其各國聞之尙爲我危苦口勸阻中國稍有忠君愛國之心者亦皆痛心疾首請勿畫押豈得謂爲謬論此李相一人偏執已見必欲成之而後快實所不解幸聖明在上燭照堅持俄謀遂爾暫沮然俄人垂涎已久早視東三省爲已有貪心未息若不趁此藉各國公議令其撤兵斷無甘自退讓之理暫踞終成永踞其數月來江鄂往返籌商並探詢各國外部惟有趁此公議之時請各國公斷一策將俄人自立之約十一條置之不論庶俄在各國之前不敢遽食前言明居不義之名屢經電奏在案江鄂惟知爲國家社稷計孰謬孰是朝廷自有明察天下自有公論江督昨電樞廷轉電全權照會領袖公使詰俄退兵之期以觀俄人動靜方可籌措置之方此照會無論有益與否有何妨礙况此辦法本係日本外部之意而英義德三國外部均曾勸我交北京公使公斷四國公使一見照會定必從中以公論相助李相前勸畫押或者因恐決裂爲俄所愚今逾期不畫俄國竟無動靜自當悔悟急改乃堅執不肯照會豈始終爲俄所愚耶抑別有成見耶不顧國家之安危而專與同僚爲水火大臣舉動不當如此查萬國公法戰後立約約未提明者悉照戰後情形今北京公約俄在其內賠款數目俄國最鉅東三省兵費路費亦在其內李相

與各使屢次會議照會於東三省撤兵從未提及必然永照現在情形矣一失此機以後無法補救近聞各國公使一俟大綱十二款全數議定即行各自回國若此時不議各使回國後再不能議悔不可追矣伏祈迅賜電飭全權務即日照會領袖公使詰俄撤退東三省兵隊日期並請各國爲我將東三省善後諸事秉公公斷或竟可不立專約至美日兩國所請將東三省開門通商辦法最爲善策欲永保東三省不爲俄佔非藉各國牽制不可亦望飭令全權照會各國言俄已言明不占我土地不俟俄將三省還我時再行開門通商許各國以居住通商開鑛製造一切利益等語則各國均冀中國永保東三省自存之權不願別國來侵且似此措詞亦甚虛活俄心雖不悅而無詞以責我庶幾祖宗根本之地可望收回中國全局不至自取分裂天下幸甚請代奏之洞軫

(四六五四)軍機處電寄奕劻李鴻章諭旨

光緒二十七年六月十三日  
電寄檔

奉旨蒸電覽悉殊堪詫異據稱京使館留兵二千核與該王大臣前奏使館留兵共計僅數百名之語大相懸殊即天津及沿途留兵之數亦多至萬人回鑾所以慎重者正因公約未畫洋兵未撤之故乃該王大臣於畫約遲早全未奏及昨經電詢始云不再畫約前據稱撤

兵日期有六月內全撤之語今又云由河南回鑾始行全撤亦屬前後兩歧霄旰憂勞無一日不繫念於此該王大臣此奏獨不爲朝廷設想於心安乎欽此六月十三日

(四六五五)宗室崑岡等奏日本照會擬于城內建造萬靈塔以爲設祭招魂之所摺

光緒二十七年六月十八日

奴才宗室崑岡奴才世續跪奏爲奏聞事奴才等現據日本國照會內稱該國使臣擬於城內擇地建造萬靈塔一座以爲設祭招魂之所現勘得雍和宮牌樓東南角有空地一塊甚屬合宜應卽開工修造等因知照前來查照會內稱係在牌樓東南角空地建造萬靈塔有無窒礙之處當飭該管司員等前往查看據實稟覆現據該司員等查得該國擬擇蓋塔之所係在雍和宮昭泰門外牌樓擇東南角空地內建蓋所有恭備各項差使均無窒礙等因稟覆前來除由該國建造外理合恭摺奏聞再此摺係照例借用武英殿印信拜發合併聲明謹奏光緒二十七年六月十八日奉硃批知道了欽此

(四六五六)慶親王奕劻大學士李鴻章奏商定各國使臣覲見禮節摺

光緒二十七年六月十一日

臣奕劻臣李鴻章跪奏爲按照和議總綱第十二款商定各國使臣覲見禮節恭摺仰祈聖鑒事竊據領銜日國使臣葛絡幹三月初一日照會內開諸國會同覲見皇帝必在太和殿其一國使臣單行入覲者必在乾清宮使臣呈進勅書或國書必派御輿暨應有之侍衛前往使館並參隨各員同迓覲見之官禮成後一體送歸使臣齋奉國書必由各中門行走皇帝必親手接收國書諸國使臣至宮殿階前降輿儻設宴款待必在乾清宮皇帝必躬親入座各禮節必與自主平等大國成規相符等語臣等查覲見一事因中西體制不同各國使臣動援西例相衡以爲相形見絀三十年來爲此事彼此辨駁迄未能定今乘聯軍大勝之後請將禮節更改固係有挾而求然各國既有成規則所言亦非盡無禮祇可就其能行者酌予通融擇其不能行者力加駁阻爰指出礙難照辦者四端一使臣會同覲見必在太和殿一使臣呈遞國書須派御輿迎迓一使臣覲見在宮殿階前降輿升輿一設宴必在乾清宮皇帝躬親入座一面備文照復一面與各使公推承辦覲見禮節之美國使臣柔克義日本國使臣小村壽太郎竭力磋商三月二十三日又接葛絡幹照會但允將會同覲見改在乾清宮而輜用黃色在宮殿階前降輿仍不肯改至設宴一節據稱各使並無必請賜宴之

意臣等復以轎色祇有皇帝用黃諸王公大臣皆用綠各國使臣入覲時由內務府備派綠呢大轎迎送已足以昭隆重若乘坐黃轎未免駭人聽聞礙難轉奏又降輿升輿一節中國向來體制王公大臣均在東華門外降輿惟賞紫禁城內乘坐肩輿者方能乘椅轎至景運門各使既請均在乾清宮覲見入宮之路必由景運門應做中國王公大臣特賞紫禁城乘坐肩輿之例於進東華門後換坐椅轎至景運門停下轎較爲相宜備文照復旋聞英國使臣薩道義嘖有煩言謂照復詞氣不甚和平意將痛加駁斥臣等佯爲不知彼亦竟置不答繼思迴鑾在邇覲見禮節必須早日商定戶部右侍郎那桐奉出使日本之命小村壽太郎頗與聯絡因屬其酬應之便婉然熟商許以綠轎加用黃繮小村允與各使商酌臣等復又辦給照會大意以日後或有國王及太子等來京必須豫留區別地步敍明轎加黃繮下轎可在景運門外五月十七日據日使葛絡幹照復轎加黃繮各使遵允惟降輿請改在乾清門外等語臣等復又備文商酌改爲至景運門外換坐椅轎至乾清門外階前降輿略示通融以期就範茲據日使復稱各使視以爲然等語自應就此定議竊思歐美各邦咸以遣使聯交爲重軺車來往絡繹於途將命呈書儀文必洽輿戎出好消息可以徵參上年啓衅之端莫甚於攻圍使館是以此次各使必欲將覲見禮節乘機更改積年所不能請者一旦邀



准雖覈諸西國敬使之議未必盡爲過當而揆諸天澤堂廉之辦豈能每事曲從臣等設法磋磨歷時至數月之久始將乘坐黃轎及在太和殿覲見暨宮殿階前降輿三節酌議改易其在乾清宮設宴一節賜宴與否既可不拘自應暫從緩議遇有應行設宴款待者統由外務部出名不言賜宴各使當無可挑剔也所有商定使臣覲見禮節緣由除將來往照會鈔送軍機處查核外理合恭摺由驛具陳伏乞皇太后皇上聖鑒訓示謹奏光緒二十七年六月十九日奉硃批依議欽此

(四六五六) 附件一 奕劻李鴻章奏派張佩綸往江南一帶考核稅課商情片

再和議大綱第十一款凡通商行船各約以及關乎通商各項事宜各國以修改爲有益者中國認與商議更改等語雖經臣等辨駁必須彼此有益始認更改而有益於彼者必有損於此求其華洋俱益深恐未易辦到迭奉電諭飭令盛宣懷來京會辦該宗丞旣未能速來而商籌國計實不僅在上海一隅必當先事綢繆臨時議約始可徐圖抵制張佩倫隨辦交涉倏已三月有餘於賠款出入時以上下交困爲慮頗有見地赫德甚重其語至其才優品潔卽臣奕劻亦深器之擬令馳赴江南一帶將稅課盈虛商情疲旺逐處咨訪考核以備采

擇且新政尤重理財於東南商民生計瞭然胸中亦足爲變法之一助除飭該編修卽日航海南行外理合附陳伏乞聖鑒謹奏光緒二十七年六月十九日奉硃批知道了欽此

(四六五六)附件二 奕劻李鴻章奏河南停考地方并會試難在京城舉行情形片

再停考一事前擬領銜日國使臣葛絡幹照復北京會試尙須詳細查核並稱河間府一處俟訪查後再復究竟可否免停未定準又據河南撫臣松壽電稱南陽府光州陳州府鄭州河內縣五處均無戕害陵虐洋人情事請與各使商免停考當經備文照會商辦去後旋據英國使臣薩道義面稱會試仍必須停並稱四月二十五日上諭提明直隸省之北京順天府等地方均應停止文武考試五年是已包會試在內無再允舉行之理查臣等前次奏呈停考地名清單摺內本已聲叙英使持之最力乃磋商至再仍爲該使所阻茲據領銜葛使照稱河間府考試照舊開辦河南南陽府光州兩處實有陵虐西人之情仍請停考北京會試一事四月二十五日上諭諸國全權大臣視爲妥善自應遵照辦理等語揆度情形會試難在京城舉行將來祇可由禮部另籌變通之法理合附片陳明伏乞聖鑒謹奏光緒二十七年六月十九日奉硃批另有旨欽此

(四六五七)會辦商務大臣盛宣懷來電

光緒二十七年六月二十日到  
電報檔

頃有洋兵官自津來滬面稱目前聯軍所留德法各三千名英日各一千五百名俄五百名  
意三百名美奧各二百名詢其德法何以獨多據稱將來當各去其半宣懷霽

(四六五八)會辦商務大臣盛宣懷來電

光緒二十七年六月二十二日到  
電報檔

德領事接德使電現在各使推舉德英法日四使辦理末次和約稿將以前至今所議准各  
事包括訂成一約章照此情形和約數日便可議妥和局便算大定等語宣懷元

(四六五九)慶親王奕劻大學士李鴻章來電

光緒二十七年六月二十五日到  
電報檔

和議大綱佳電聲明最要只賠款禍從兩端十五日據各使照會附送還款表一紙前五年  
除付利外每年帶還本不及百萬嗣後按年遞加至三十九年止統共還本利九百八十二  
兆二十三萬餘兩較從前各表所省尚多所指抵款仍如前電鹽課釐並常關進項餘剩之  
新關各稅及進口稅切實值百抽五並免稅各貨酌量照征內惟常關應歸新關管理此外

并不干預惟知目前財力艱窘允緩半年付利由西歷明年正月初一即華冬月廿二起照  
付仍將此半年息銀分三年帶付此外詳細節目正在推敲至外省禍從專屬英法二國催  
據該使核定送到內有輕減者即日繕單馳奏務求早降明諭惟奉電旨催令畫押臣等派  
員催詢已可就範昨德使穆默來臣鴻章寓密商將前後所議已定未定各款用洋文臚列  
擬成一約據稱各使意見不一宜再立約以整齊之以免撤兵遲誤內惟禁軍火通商行船  
二款當未議及伊等以運進軍火暫停二年通商各事頭緒繁多非目前能定惟吳淞口天  
津海河淤淺過甚必須中外合力集資修濬此當載入約內伊等擬再會議一次即定稿互  
商畫押此押一畫各國訂於七月初二以前將京城洋兵除留護京館外餘俱撤淨合先詳  
晰奏聞仰慰聖廑請代奏奕劻李鴻章等

(四六六〇)會辦商務大臣盛宣懷來電

光緒二十七年六月二十七日到  
電報檔

各國願關稅估足值百抽五並免稅各貨酌量照征此係去年第一議所加無多於釐金毋  
庸撤併自可先行照辦有益無損如將來欲我撤併釐金似非照去年第二議正千加倍值  
百抽十五不可似須請全權預留地步宣懷養

(四六六一)軍機處擬致奕劻李鴻章電信

光緒二十七年六月二十七日  
電寄檔

頃據盛宗丞電稱各國願關稅估足值百抽五並免稅各貨酌量照徵此係去年第一議所加無多於釐金毋庸撤併自可先行照辦有益無損如將來欲我撤併釐金似非照去年第二議正子加倍值百抽十五不可等語希尊處查照預留地步樞沁

(四六六二)軍機處擬致張翼電信

光緒二十七年六月二十八日  
電寄檔

此次拳匪肇亂實由教士平日袒縱教民欺壓良民積忿莫申遂輕信拳匪激成大變必須與各國議明以後民教交涉章程訂立專約方能民教相安永弭後患中外各官條奏皆以此爲要務而全權不能與各國妥議因思執事曾有遣使詣教皇商訂教案章程之議今值義國請醇親王親臨羅馬之便機不可失卽希台端於隨同到羅馬時親見教皇實告以天主教主司鐸等在華濫收匪人入教縱容教民遇事欺凌平民釀激拳匪之禍大失傳教勸善之意向其婉切商定請其嚴戒主教等恪守教規不准濫收匪類入教凡民教詞訟悉由地方官持平秉公辦理教士等不准干預包庇訛索教堂偶因滋事被毀務須公平議價

賠償不得藉詞動輒要索巨款以期日久相安永敦睦誼中國傳教以天主教爲最橫行無理皆羅馬教皇所轄此外各國之耶穌教亦各有教會亦望於所至各國查詢各大教會一律向其妥商民教交涉條約免再激生事變不惟中國受害卽各國商務亦不能不因之傷損且敗傳教之聲名也特爲電達應如何妥籌商辦之處仍須先行電知爲盼樞沁

(四六六三)安徽巡撫王之春預籌議約抵制辦法摺

光緒二十七年六月初六日  
光緒二十七年七月初四日到

頭品頂戴安徽巡撫臣王之春跪奏爲預籌議約抵制辦法恭摺陳仰祈聖鑒事竊維各國於此次和議擬改通商行船約章欽奉諭旨飭令劉坤一張之洞盛宣懷悉心籌議仰見聖主顧念時艱慎重因應之至意歷溯道光咸豐以來迫於兵戎訂立諸約其中不無虧損而每屆修改輒有要求屢煩支柱今彼愈衆盛我愈孤危苛索之端勢且滋甚伏查通商行船各事宜上關國家主權下繫商民生計舊約旣損失甚鉅改議更侵削可虞每一思維憂憤曷極惟查各國事例除戰後專約不免迫脅外其於常行約章意在彼此相安例得反復駁辦往往彼索利益則此議抵償或至相持并可暫置故雖極費唇舌多歷歲時從無因此

復致決裂之事惟在熟審機宜堅持定見我不搖於恫喝彼乃漸就範圍今雖開議尙早而籌策不可不先迭准劉坤一張之洞等咨商到臣謹就管見所及敬爲我皇太后皇上陳之一議改稅則必酌量相抵之法有一減必有一增大抵我所必需及已能仿製者稅不妨減其貴重如鐘表玩具之類耗民財者增之煙酒尤宜援照彼法加重從前定約原因在華洋人所用無幾故從寬免稅今此兩項爲進口大宗勢不能不取稅各國於此稅未有不視爲宜重者諒無詞以拒我也

一凡不通商口岸例不准洋人設立機廠製造土貨若各國爭此則請無論華洋俱免徵出口稅使所製能輸出外洋是無異召外人爲我流通土貨雖徧地設廠無礙也若內地銷售仍照稅則徵取以保稅源

一禁米出口久成具文似宜於出口稅加成以爲不禁之禁惟須各關卡一律嚴辦庶無此堵彼決之弊不致以加稅失向來稅源其民船在口內買賣應仍照舊辦理

一添開口岸拓展租界爲此次所必議宜照湖北例先自闢地段設工局巡捕以握主權且以此抵償他項要素實足以鑿其心而關其口日本常用此法以收回權利成效昭然也

一開濬海口及江道阻滯事爲各國所通行我卽難以獨拒惟須華督洋辦以明賓主之義

且此事理應自主只可許其隨時酌辦不宜載入約章以杜干預內政之漸其修濬經費加之輪鈔可也

一內河准洋人行輪已成大錯今惟有廣招華商於凡小輪能到之地先自爲之并抱定民船生計立論只許拖帶不許自裝其一切防弊章程華洋俱須一律遵守

一鹽利關係國課民生且內產充滯方待疏暢更不能任洋鹽灌入此我所必拒者更宜整頓鹽法講求煎曬務使鹽質精潔足敵外私冀得分利塞源永絕覬覦

一開礦應以指礦承辦不包通省爲要尤以每辦一礦墊輸稅課爲要較空索報效似有實濟臣於本年四月初八日條陳摺內業已詳晰陳明若蒙採擇應請早自定議俾該王大臣議約時有所依據至各省鐵路只可借洋債用洋工而不能任洋人自造應請諭令路礦總局并加核議垂爲定章以息紛擾

以上八條皆揣諸外情尙非強以難赴揆之理勢亦實在所必爭但能力與磋商似尙不無裨益是否有當伏乞飭下議約王大臣體察情形相機辦理其從前杜弊各章應并由該王大臣擇要堅持以維全局抑臣更有請者查舊約之失策最甚者莫如治外無權制稅無權二端而各海關之稅權付英東三省及山東之路權付俄付德皆足以啓各國之輕視召無



厭之要求今成事雖難與爭而綢繆不容少懈查日本明治之初其誤許各國之約害多與我相等所以能逐漸修改終歸妥善者固由於國威之能振亦實由其於條約事宜派有專員與外部各員考其害之輕重爭之難易而因以籌補救之機宜雖效非一蹴可幾而事必以豫而立臣愚以爲此次若改定總署規制似宜將考究條約一事列爲司員考成務使人人於各約利弊及內外情形了然於中於以預籌修約時迎距之宜與商改之法雖未必盡改舊觀而爭一分有一分之益且使各國知我熟諳外情不生心得步進步庶交涉不至棘手罅漏亦漸可補苴微臣熟察事勢痛心於外侮紛來益令我內政難舉敬念主憂臣辱之義當效千慮一得之愚區區微忱伏望聖明鑒察所有預籌議約抵制辦法緣由理合繕摺密陳伏祈皇太后皇上聖鑒採擇施行謹奏光緒二十七年六月初六日

(四六六四)慶親王奕劻等奏呈出使日本大臣敕書國書摺

光緒二十七年六月二十五日

臣奕劻等跪奏爲謹擬出使日本國大臣敕書國書恭呈御覽仰祈聖鑒事竊臣衙門准軍機處電傳光緒二十七年五月十九日諭旨前江蘇蘇松太道蔡鈞著以四品京堂候補充出使日本國大臣俟李盛鐸報滿卽行前往接替欽此查向章出使大臣奉命後應先頒給

欽定大清會典事例 卷六十四 二十二  
敕書接任辭任各應呈遞國書歷經辦理在案今候補四品京堂蔡鈞出使日本自應頒給  
敕書俟抵該國時卽行呈遞接任國書前使日本國大臣李盛鐸任滿回華亦應將辭任國  
書呈遞以符向章謹照案擬就分繕清單恭呈御覽俟命下之日卽由臣部繕寫請用御寶  
咨送該大臣等分別祇領呈遞所有謹擬出使日本國大臣敕書國書緣由理合恭摺具陳  
伏乞皇太后皇上聖鑒謹奏光緒二十七年七月初五日奉硃批知道了欽此臣奕劻臣王  
文韶臣瞿鴻禨臣徐壽朋臣聯芳

(四六六四) 附件一 出使日本大臣李盛鐸回華辭任國書

謹擬出使日本大臣李盛鐸回華辭任國書恭呈御覽

大清國大皇帝敬致書大日本國大皇帝陛下我兩國睦誼素敦近日邦交更臻親密前此  
特簡三品卿銜順天府府丞李盛鐸爲駐劄貴國欽差大臣接任以來極承推誠相信俾盡  
厥職現因期滿召令回國除已另行簡員接替外仍令該大臣於臨行時親遞國書以表往  
來通好之儀藉示鄭重邦交之意惟大皇帝鑒察爲盼

(四六六四) 附件二 蔡鈞出使日本敕書

謹擬候補四品京堂蔡鈞出使日本國敕書恭呈御覽

皇帝敕諭欽差出使日本國大臣候補四品京堂蔡鈞朕維親仁善鄰爲國之寶矧切同洲之誼隆遣使之文今特命爾充出使日本欽差大臣爾其仰體朕懷悉心經理於其國勢民情之所向政策治要之大端亟宜講求用資考鑑交涉事務請旨遵行並知照外務部辦理隨行官員聽爾節制其各勉以職守無損名譽於貿易華民則安其生業俾利益之優霑於肄業諸生則督其課程期成材之可造凡茲庶務責任攸歸無貽樽俎之羞勉副皇華之選爾往欽哉勿負委任特諭

(四六六四) 附件三 蔡鈞接任出使日本大臣國書

謹擬出使日本國大臣蔡鈞接任國書恭呈御覽

大清國大皇帝敬致書大日本國大皇帝陛下我兩國同在亞洲海程密邇自各派使臣駐紮以來誠信相孚情誼彌摯每念東方時局益切輔車唇齒之思比因事變猝遭尤感救災卹鄰之誼茲出使大臣李盛鐸奉使期滿特派候補四品京堂蔡鈞爲出使駐紮貴國都城

欽差大臣親齎國書表明朕意該大臣才猷敏練學識明通辦理兩國交涉事宜必能悉臻允洽尙望大皇帝推誠相與俾盡厥職從此兩國信使往來和好無閒歷久彌親以期維持亞東大局共享昇平惟大皇帝鑒察焉

(四六六五)慶親王奕劻等奏呈出使韓國大臣敕書國書摺

光緒二十七年六月二十五日

臣奕劻等跪奏爲謹擬出使韓國大臣敕書國書恭呈御覽仰祈聖鑒事竊臣部准軍機處電傳光緒二十七年六月初二日諭旨雲南候補知府許台身著以道員用並賞加四品卿銜派充出使韓國大臣欽此查出使大臣向須頒給敕書接任均須呈遞國書道員許台身前充駐韓使署參贊現在奉旨派充出使韓國大臣自應照章繕發敕書一道並頒給國書以便在韓與該外部定期呈遞至前任使韓大臣徐壽朋雖已先期回華亦應由新任使臣代遞辭任國書以重使事謹照案擬就分繕清單恭呈御覽俟命下之日卽由臣部照繕請用御寶咨送該大臣等分別祇領呈遞所有謹擬出使韓國大臣敕書國書緣由理合恭摺具陳伏乞皇太后皇上聖鑒謹奏光緒二十七年七月初五日奉硃批知道了欽此臣奕劻臣王文韶臣瞿鴻禨臣徐壽朋臣聯芳

(四六六五)附件一 出使韓國大臣徐壽朋回華辭任國書

謹擬出使韓國大臣徐壽朋回華辭任國書恭呈御覽

大清國大皇帝問大韓國大皇帝好朕眷念友邦素敦睦誼前此簡派太僕寺卿徐壽朋爲駐紮貴國欽差大臣接任以來極承推誠相信俾盡厥職茲因先期召令回國另行簡員接替其辭任國書卽令新任大臣許台身代遞以表往來通好之儀藉示鄭重邦交之意惟大皇帝鑒察爲盼

(四六六五)附件二 許台身出使韓國敕書

謹擬四品卿銜道員用許台身出使韓國敕書恭呈御覽

皇帝敕諭欽差出使韓國大臣四品卿銜道員用許台身國家慎固邦交每以講信修睦爲首務皇華遣使責任攸歸今特命爾出使韓國欽差大臣以示修好之意自非尋常遣使之比爾其仰體朕懷悉心經畫凡事度理揆時相機籌辦仍一面請旨施行並知照外務部辦理隨行官員聽爾節制其有華商在韓貿易並內地人民在韓國者宜隨時隨事設法保護

約束爾其殫竭智慮敬謹將事無負委任如或措置失當致滋貽誤國有常憲爾其慎之特

諭

(四六六五) 附件三 許台身接任出使韓國大臣國書

謹擬出使韓國大臣許台身接任國書恭呈御覽

大清國大皇帝問大韓國大皇帝好我兩國水陸接壤文軌胥同自近年互訂商約派遣駐使以來邦交益臻親密遠維舊好本休戚之相關近察時艱宜輔車之相倚茲因出使大臣徐壽朋召令回國特派四品卿銜道員用許台身接任朕稔知該大臣操履篤實志趣明通前駐貴國參贊使署事宜辦理妥洽熟悉情形茲復授為駐紮貴國都城欽差大臣親遞國書表明和好之意尙望大皇帝優加款待俾盡厥職永敦睦誼共享昇平朕實有厚望焉

(四六六六) 慶親王奕劻大學士李鴻章奏各國使館所佔民房議定給價請飭撥的

款摺 光緒二十七年六月二十五日

臣奕劻臣李鴻章跪奏為各國使館所佔民房議定給價請旨飭撥的款恭摺仰祈聖鑒事

竊查各國使館擴充地界由東交民巷至長安街崇文門大街一帶所佔四至疊經臣等電奏在案現在劃入界內房屋除公所衙署府第廟宇不計外所佔民房均係私產前據日斯巴尼亞國領銜使臣葛絡幹照會內稱各國使臣以此等迁徙失業華民應由中國出資償補並公舉數人查覈契據真偽地價多寡應請中國選派練達之員相助等因臣等以此項房地爲何人所用價費應由何人付給屢與使臣等往返駁論數日之久彼終堅執不允並據聲稱如中國不允償補各國祇得從豐覈計歸入大款內撥付等語臣等伏思款旣必須我出與其各國自定任意從豐莫若派員與議庶可覈實當經派定章京兩員並咨由步軍統領衙門順天府尹酌派數員會同設局與各國公使所派人員會商辦理茲據該員等稟稱會同查勘得東交民巷至長安街及崇文門大街一帶民產上年因亂焚毀大半住戶迁徙一空洋兵入城後事局未定又被土匪拆毀甚多一望瓦礫所存無幾惟長安街路北所展公共道路佔至東單牌樓頭二條胡同及霞公所府一帶房舍尙多整齊亦在應拆之列計自三月設局截至五月底止來局呈報者一千四百餘所計共民房一萬六千餘間疊與各使臣所派人員會議價值各該員總持各公使議論以此項房價應令足抵業主另行置產之數方爲公道並區爲上中下三等始則每間索價百餘金至數十金繼請按照契紙

原價付給統計亦需五六十萬兩爲數太鉅斷難照允磋商四閱月乃減至上等房間三十兩中等二十兩下等十兩各該員猶以所定價既少應另撥地段以便業主建造房屋再三辯駁始作罷論僅議定如有專報未經造屋空基每一方丈給銀三兩現查各戶所報此項空基無多暫且毋庸計算現就上中下三等共房一萬六千餘間統而計之非籌備銀三十五萬兩不敷分撥此項銀兩急須應付緣各業主投契數月情況窘迫勢難再緩稟請具奏前來臣等查光緒十三年順天府辦理貢院添蓋號舍佔用民產係由工部分四等定價每間由八十兩至十餘兩不等此次所定每間價目較之貢院收買民產有減無增既經該員等力與磋商無可再減自應照准以紓民困所請籌備銀三十五萬兩係就房屋間數佔算實需之數各業主家產既失分苦堪憐專候恩施以便各安生業理合奏懇飭部迅速照數指撥的款銀三十五萬兩交上海道電匯來京再由臣等轉飭該員等逐戶詳查覈實分給造冊報銷如有盈餘事竣咨部繳銷以重款項除將來往照會鈔送軍機處外所有懇請飭撥使館所佔民房給價銀兩緣由謹繕摺具陳伏乞皇太后皇上聖鑒訓示遵行謹奏光緒二十七年七月初五日奉硃批著戶部迅速籌撥欽此



(四六六七)南洋大臣劉坤一來電

光緒二十七年七月初五日  
到電報檔

全權艷電有徑沁電悉和議總綱第十一款載明凡通商行船各約各國以修改爲有益者中國認與商議更改吳淞挑沙關係通商行船各國視爲要務卽不允海關辦足值百抽五及刪除免稅之例彼援第十一款議辦我亦無從駁阻各使因議抵款附商照送吳淞章程就事而論各國因吳淞淤涉於大輪船出入阻礙屢請疏濬前迭飭滬道辦理率皆半途而廢此次各使必欲派員實有所不得已尊處謂此事必應由華官主政領事僅可派人稽查用款立論甚正然閱送來章程派入次序當有上海道稅務司居前各領事在後亦不可謂非關道主持至沿岸田房抽捐於理欠合英德領事旣向尊處陳說應請就近派員妥速商酌此事不辦則公約必不成洋兵必不撤事關總結畫押議定乞卽電知船鈔一節已詢赫德據稱恐不敷用俟復到另電至傑彌生稱挖淤卽可加稅值百抽十二五之說英使絕未言及且云傑語不可信並聞云現復以艷電悉民田民船抽費英領面云本未議抽及此德領告局員謂民船本不收費前係誤譯沿河田恐小民苦亦可免昨德領函復云修理淤口尊函解說一稅司關道爲督辦其餘各員爲參贊二沿河邊田及民船無須抽稅三船鈔須歸北京作主業已稟駐京大臣想和議畫押不致因此耽延英領函亦云將函譯呈公使先

回滬今日貝領偕英班領來晤謂公使電全約待此應允方定告以黃浦江現已允開除民  
船民田免捐外祇於辦事之權不能不屬海關英總領又謂由各國派員設局奉薩公使電  
祇令告知並未令其商議答以既無可商議何須費詞英總領擬即返滬查派辦此事雖有  
關道稅司在內事由何人主持究未聲明關道稅司均謂權不可失縱開淤有關通商行船  
在我祇須允辦在彼不應攬權况開淤以工程用費爲要今允由各國派官商會同商辦工  
程查察用費並公舉辦工洋人於開淤之事已屬切實辦法此外皆稅司關道分內之事自  
未便因借開淤一併干預不獨礙一口事權且恐以後遇事援例並南北各口自主之權亦  
失此事僅告知敝處不與會商自應歸尊處定議惟其中事權所關不敢不請鼎力主持熟  
商等語謹聞坤東

(四六六八)軍機處擬致奕劻李鴻章信 光緒二十七年七月初六日

致全權信逕啓者來奏請重降諭旨於前十員酌改聲叙並續議各省教案處分人員全案  
已照來奏請降諭旨分別懲處惟查片內云各使此次雖允輕減祇送草單並無照會蓋恐  
刪去永不敘用字樣於第十條有礙等語今照續議改輕各員處分逐一敘明能否不致饒

舌請刪去永不敘用與第十條不符因思彼既有草單作憑則臚列銜名或但云照單開處分分則輕重懲處不必逐一明敘輕減處分似與彼只送草單之意暗合或不致有詞指摘是以另擬不注處分一單附寄備用如需更換即將諭旨後半接續羅芳林處分之下改寫亦選由尊處發抄俟將來須刊曉諭另照單開各員處分咨行辦理統祈酌定電復再塔拉特王現交信恪查辦尙未據覆中喀爾王已傳旨申飭來單乃謂未辦應請聲明又許道培任至琛袁福齡三員因彼謂須載明罪名是以另擬單內於該三員仍多注數語并附及之至停考一節四月二十五日業降明諭現將免停之陳州府鄭州河內縣鄱陽縣四處刪去並更動省綱次序又於停考五年下添以爲輕信拳匪及鬧教滋事者戒二語恭錄附寄希卽將此旨發抄頒刊統希示復敬請勛祺

(四六六九)慶親王奕劻大學士李鴻章來電

光緒二十七年七月初九日到  
電報檔

頃領銜日葛使將總結條款備文送來大致均照已經允辦之件惟須停考試懲處外省各員禁運軍火三事有明降諭旨方能會同畫押查懲處外省各員摺單暨停考請降明諭片均前月二十三日發計日內可到又大綱第五款禁運軍火暨製造軍火各種器料進口議

定兩年為期豔電請降旨自己早達務請速降明諭三道以便畫押而完和議請代奏奕劻

李鴻章歌

(四六七〇)大學士李鴻章等奏報皇史宬遺失大概情形摺

光緒二十七年七月初二日

大學士臣李鴻章等跪奏為據實奏聞仰祈聖鑒事竊自和局議定各國聯軍始於本年五月六月間節次將上年占領地段及衙署等處逐漸交還臣等當因皇史宬為尊藏實錄聖訓重地向歸臣衙門兼管一經聞悉該處洋兵撤退即於六月二十日派令臣衙門掌印侍讀紹昌前往接收並囑其查看情形敬謹封固旋據該侍讀稟稱遵查皇史宬石門已開拐鎖門門概行失毀石門內台上恭存金櫃共一百四十一隻尙不短少惟櫃上罩單鎖鑰暨前後什件並卷數金牌無一存者恭檢前面櫃內樟木內函暨龍袱牙籤全行失去函內實錄聖訓間有只贖一二本者並有污損形迹靠後金櫃限於地勢非逐匱挪移另地設案將函卷請出按次詳細清查不克備悉短失卷數至石門內門扇牆壁石台均無損壞情事當將石門關閉暫用封條黏固並將門扇尺寸丈量清晰迅即配購拐鎖木門於次日傳集守護該處之守尉守吏等眼同封鎖嚴飭該守尉等常川看守以專責成各等語臣等恭查石室

藏書古今盛典惟我朝敬宗尊祖尤爲前代所無詎倉卒變生致有遺失情事此皆臣等知慮短淺未能先事預防慚憤曷極現聞守護禁門之日本洋兵擬於七月間撤退彼時臣等自應回署辦事卽當由臣等率同侍讀中書等逐日前往皇史宬將滿蒙漢各文實錄聖訓敬謹澈底查明實在短失數目應如何補繕之處再當請旨遵行至臣衙門逐日應進實錄向存內閣大庫前於光緒二十五年因庫內滲漏奏請興修當將實錄聖訓移置文華殿東廡尊放昨臣衙門侍讀紹昌隨同尙書世續專使大臣那桐恭奉國書用寶據該侍讀稟稱就近至文華殿看視鎖鑰封條均無脫落痕迹臣等覈其情節其爲無所遺失已可概見將來補繕皇史宬所失卷數儘可奉爲底本至金匱內外所失物件如內函鎖鑰龍袂牙籤等項均屬派員清查時必須備用之物應如何覈實購辦以期迅速而昭慎重之處伏候聖裁所有皇史宬尊藏實錄聖訓遺失大概情形理合據實先行奏聞伏乞皇太后皇上聖鑒訓示謹奏光緒二十七年七月初十日奉硃批著卽派員敬謹清查將應用各物製備齊全所需經費核實開報餘依議欽此大學士臣李鴻章臣榮祿（在行在）臣宗室崑岡臣王文韶（在行在）協辦大學士臣崇禮臣徐卣

(四六七〇)附件一 李鴻章等奏皇史宬石門內臺下銀印一箱全行失去片

再查臣衙門兼管之皇史宬石門內臺下向存虎紐銀印一箱計共三十四顆係我朝命將出師凱旋恭繳者比因上年變亂箱內銀印全行失去臣等謹將該印名目按照臣衙門所存印譜開單恭呈御覽謹附片陳明伏乞聖鑒謹奏光緒二十七年七月初十日奉硃批知道了欽此

(四六七〇)附件二 皇史宬遺失銀印數目清單

謹將皇史宬遺失銀印數目繕具清單恭呈御覽

計開

奉命大將軍印一顆 改鑄清篆印一顆

撫遠大將軍印一顆 改鑄清篆印一顆

寧遠大將軍印一顆 改鑄清篆印一顆

安東大將軍印一顆 改鑄清篆印一顆

征南大將軍印一顆 改鑄清篆印一顆

平西大將軍印一顆 改鑄清篆印一顆

平北大將軍印一顆 改鑄清篆印一顆

欽命總理一切軍務儲精經略大臣之印一顆 改鑄清篆印一顆

鎮海將軍印一顆 改鑄清篆印一顆

揚威將軍印一顆 改鑄清篆印一顆

靖東將軍印一顆 改鑄清篆印一顆

征南將軍印一顆 改鑄清篆印一顆

定西將軍印一顆 改鑄清篆印一顆

定北將軍印一顆 改鑄清篆印一顆

靖逆將軍印一顆 改鑄清篆印一顆

定邊將軍之印一顆 改鑄清篆印一顆

定邊右副將軍之印一顆 改鑄清篆印一顆

以上銀印共三十四顆

硃批覽

（四六七二）慶親王奕劻大學士李鴻章來電

光緒二十七年七月十一日到電報檔

各使送來總結條款底稿仍按上年和議大綱十二款次序首列各使及全權銜名次并言其文曰今日會同聲明核定大清國按光緒二十六年十一月初一日文內各款當經大皇帝於十一月初六日降旨全行照允足適諸國之意妥辦等語以後即按款臚叙茲提要節錄如左

第一款德國克大臣被害奉旨欽派醇親王爲專使大臣赴德代表惋惜之意醇親王已遵旨起程二暨立銘誌之碑與克大臣品位相配現於遇害處建立碑坊已經興工

第二款一懲辦傷害諸國國家及人民之首禍諸臣將上年十二月二十五本年正月初三等日先後降旨所定罪名開列並將承認獲咎之各外省官員降旨分別懲辦二某年月日奉旨將諸國人民遇害被虧之城鎮停止文武各等考試五年

第三款日本書記生被害已派戶部侍郎那桐爲專使

第四款諸國墳塋建立滌垢雪污之碑銀已付清

第五款軍火暨專爲製造軍火各種器料於某年月日奉旨禁止進口二年



第六款按照本年四月十二日上諭允定付諸國償款海關平銀四百五十兆兩此款係上年十一月初一日條款第二款所載之各國各會各人之賠償總數

甲此四百五十兆係照海關銀兩市價易爲金款此市價按諸國各金錢之價易金如左不備錄此四百五十兆按年息四釐併本利分三十九年按後附之表清還本息用金付給或按應還日期之市價易金付給各款應按每屆一年付還初次定於一千九百零三年正月初一日付還利息由一千九百零一年七月初一日起算中國亦可將所欠首六個月即算至一千九百零一年二月底之息展在自一千九百零二年正月初一日起即中歷本年十一月廿二日於三年內付還但所展息款亦應按年四釐付息

乙此欠款一切事宜均在上海辦理諸國各派銀行董事一名會同將所有由中國官付給之本利總數收存分給有干涉者該銀行出付回執

丙中國將全數保票一紙交付駐京領銜大臣手內此保票以後分作零票每票上由中國官畫押

丁付還保票財源各進款應每月給銀行董事收存抵所定承擔保票財源列後一新關各進款俟前已作爲擔保之借款各本利付給之後餘賸者又進口貨稅增至切實值百抽五

將所增之數加之所有向例進口免稅各貨除米糧麵金銀錢外均應列入值百抽五貨內  
二所有常關各進款在各通商口岸之常關均歸海關管理三所有鹽政各進項除還前太  
西借款外餘剩一併歸入呈進口貨增至切實值百抽五諸國現允可行惟須二端一將現  
在照估價抽收進口各稅凡能改者皆當速改按件抽稅幾何定辦改稅應以滿三年各貨  
價值牽算其未改以前仍照估價征收二北河黃浦兩水路均應改善中國國家應撥款相  
助增稅一層俟此條款畫押兩箇月後卽行開辦

第七款大清國國家允定各使館境界以爲專與住用之處並獨由使館管理中國人概  
不准在界內居住亦可自行防守使館界綫於附件圖上標明按照上年十一月二十六日  
文內條款中國國家應允諸國分應自主常留兵隊分保使館

第八款大清國國家應允將大沽礮臺及有礙京師至海通道之各礮臺一律削平現已設  
法照辦

第九款按照上年十一月二十六日文內條款中國國家應允諸國分應主辦會同酌定數  
處留兵駐守以保京師至海通道今駐守之處係黃村郎坊楊村天津軍糧城塘沽蘆臺唐  
山灤州昌黎縣秦王島山海關

第十款大清國國家允定兩年之久在各府廳州縣將以後所述之上諭頒行布告一上年十二月十三日上諭永禁或設或入與諸國仇敵之會違者皆斬二本年某月日上諭一道犯罪之人如何懲辦之處均一一載明三本年某月日上諭諸國人民遇害被虧各城鎮停止文武考試上年十二月十三日上諭各省督撫文武大吏暨有司各官於所屬境內如復滋傷害諸國人民之事必須立時彈壓否則革職永不叙用以上諭旨現於中國全境漸次張貼

第十一款大清國國家允定將通商行船各條約內諸國視爲應行商改之處及有關通商各他事宜均行議商現按第六款賠償事宜約定中國國家應允襄辦改善北河黃浦兩水路一北河改善河道前會同中國所興各工近由諸國派員重修俟天津交還後即可由中國派員會辦中國應付海關銀每年六萬兩二現設黃浦河道局整理水道該局經費豫估二十年用海關平銀四十六萬兩半由中國付給半由外國有干涉者出資該局員差各權責及進款詳細各節皆於後附文件內列明

第十二款本年六月初九日上諭將總理各國事務門改爲外務部諸國大臣覲見禮節均可商定茲特議明以上所述各語及執附諸國大臣所發之文憑均以法文爲憑條款畢

大清國國家既按以上各款足適諸國之意妥辦將上年變亂局勢完結諸國亦允照隨行是以諸國全權大臣奉各本國政府之命聲明除第七款所述防守使館兵隊外諸國兵隊於本年某月日全由京城撤退並除第九款所述各處外亦於年某月日由直隸撤退今將以條款繕定同文十二分由全權大臣畫押諸國全權大臣各存一分中國全權大臣收存一分光緒二十七年某月日在北京定立等因款內所載歷次諭旨及往來文牘均附各款之後是以停考五年地名懲處各員人名暨禁止軍火並專爲製造軍火器料進口均請速降明諭以便載入其京師直隸撤兵各日期當俟正約畫押時填註臣等伏查去秋各國聯軍闖入京城聲勢浩大乘輿播遷幾不知如何結局直至冬月下旬始送到議和條款不容我改易一字朝廷爲息兵救急之謀祇得俯如所請既經許其照辦斷難失信外人且彼恃其兵力之強亦決不容我失信嗣各國以各款不能迅速照辦爲辭橫生枝節經臣等多方設法竭力磋磨至四月間賠款議有端倪奉旨允付償款四百五十兆並許認息四釐事機始漸順手京師地面亦陸續分段交還然地面雖大半交回各國以爲未訂全數撤兵之期尙有佔理地方權力英使薩道義商堅執外省獲咎人員及停止考試二事未經辦完斷難許有全數撤兵之期而獲咎人員散在各省查復需時軍機處及各督撫來電帶有應商減

免之員各使甚爲厭煩又不肯以時答復遂至曠延時日其償息抵款除鹽款常稅外各使均不願受而德穆使初擬賠款表共須付還本利至九千零七十餘兆之多屢經苦口相商始改成末次款表計可省銀九千萬兩各使商辦進口貨收足值百抽五並免稅貨征稅亦遲之又久而後定其天津瀋海河黃浦挑淤沙皆各國蓄意必辦之事今既用爲增稅酬報且關係大綱十二款通商行船事宜斷難駁阻黃浦沿河各使附來章程再三酌商已有數條於各領事上加寫南洋大臣字樣似不至喧賓奪主舊約既未作廢第十一款更改商約一語即可就此了結若開河事從緩另議斷做不到臣等於條款稿送來之前一日曾備照會敘述南洋來電切實商酌迭准各使文函答復均稱事關各國政府商定不能再議請將條款早日請旨畫押竊思各款關繫重要之事均已陸續定議若爲黃浦挑淤遲延不能畫押殊失海內外商民之望必致另生枝節大局安危所繫用敢披瀝直陳伏乞迅賜宸斷俯准照議畫押不勝悚切待命之至除將黃浦事來往照會抄咨外請代奏候旨遵行奕劻李鴻章陽

(四六七二)慶親王奕劻大學士李鴻章來電一

光緒二十七年七月十三日到  
電報檔

昨傍晚日本小村使來臣奕劻處密告據美柔使託其轉致云和議總結條款各使俱已簽字斷乎不能更改頗有兩三國盼望中國不卽畫押得以變卦要挾如畫押能速京城洋兵於畫押後五日內可全撤直隸洋兵除留護暢道數處外十日內外亦可撤盡如畫押遲延則蓄謀之國有所藉口伊等實愧莫能助等語查美使柔克義日本使小村素有相愛之意所言似出真誠日間計禍從案奏單已到務請將停考試辦禍從及禁軍火三事速降明諭並查照總結條款陽電立准畫押以保大局否恐別生枝節一國悔議各國效尤後患何堪設想臣等不能不思思過慮也請代奏奕劻李鴻章卦思加魚旁

光緒二十七年七月十三日到  
電報檔  
奉到六月十九日寄諭謹悉查北京會試前經設法磋商各使頗有允意始料英使薩道義

未必肯以一人違衆不意薩使始終堅持各使竟無如何遂仍由領銜日使備文駁復臣等

前奏已將詳細情節敘明今各使已將條款簽字斷難再與商議此次明降諭旨請將日前片奏內所陳商明免停之河南陳州府鄭州河內縣三處扣除會試仍不必提庶條款畫押不至因此遲延請代奏奕劻李鴻章佳

(四六七四)會辦商務大臣盛宣懷來電

光緒二十七年七月十四日到  
電報檔

真電昨夜已轉全權似所請均已照准禁運軍火擬稿初八日電計早達聞美日使白慶邱言爲畫押遲延有兩三國蓄謀藉口變掛不可不防此間洋報亦頗有謠言可否禁運軍火諭卽由電發全權奏總結條款候旨方能畫押呈覽後如已核准望速請旨飭令畫押仍由電傳以免驛遞延誤大局李傅相初六後病勢甚劇近日稍愈宣懷文

(四六七五)軍機處擬致奕劻李鴻章電信

光緒二十七年七月十八日  
電寄檔

諫電所轉醇王呂使咸電已進呈呂使另電擬交各國原議公約使臣將受書禮節持平訂定以昭公論等語此事關繫至要現在正聯邦交各國皆重情誼望卽堅託各公使出爲調停並與穆使婉切商議託其轉圜一面電知呂使與德外部再行磋磨總以磨得一分是一分如實在不能挽回應與照會議明此次專使原爲道歉姑爲通融酌允以後仍按照各國通行之禮不得援此次爲例尊處託各公使調停應否將此意告知祈裁酌樞嘯

(四六七六)慶親王奕劻大學士李鴻章來電

光緒二十七年七月二十日到  
電報檔

初六驛遞上諭迄未奉到各使立候畫押催詢甚急務請將懲辦各員諭旨迅速電傳至停考上諭各使均請即以四月二十五日所發除去隨後商明允停四處附載約後可無庸電傳矣慶李效

(四六七七)會辦商務大臣盛宣懷來電

光緒二十七年七月二十五日到  
電報檔

京電公約明午前十一點在日使館畫押宣懷敬

(四六七八)慶親王奕劻大學士李鴻章來電

光緒二十七年七月二十六日到  
電報檔

各使商定本日午初畫押自畫押之日起十日內京兵除護使館外全數撤退十五日內自直隸省撤退請代奏奕劻李鴻章徑

(四六七九)出使大臣李盛鐸來電

光緒二十七年七月三十日到  
電報檔

外部定於初一日那使呈遞國書接待禮節與駐使相同謹聞盛鐸豔